


書



竹

卷十六 丙舍詩集

卷十八 東山詩集

卷二十上 東山詩集

卷十七 移居詩集

卷十九 東山詩集

卷二十下 東山詩集

牧齋初學集卷第十六

丙舍詩集

起十三年庚辰正月盡二月

庚辰元日次除夕韻

就煖風光在臘前
布袍芒屨稱新年
園梅約略迎歌扇
門柳蕭疎引畫船
遠浦煙銷看白鶴
豁厓雲過見青天
鶯花絃管尋嘗有
只合囊中辦酒錢

得曹能始見懷詩次韻却寄二首

院竹溪雲入庭花
野雀窺憶君題扇日
已是歲殘時
細雨篝燈早
輕寒命酒遲
卽看堤上柳春

月想容姿

其二

年來淪故事只合與君論伏臘先人冢樵漁聖
主恩詩來期晚歲吟罷倚柴門歎息庭梅樹天
涯共一尊

觀美人手跡戲題絕句七首

油素朝樞帖丹鉛夜較書來禽晉內史盧橘漢
相如

其二

花飛朱戶網燕蹴綺窻塵挾瑟歌盧女臨池寫

雜神

其三

蘭室桂為梁蠶書學採桑幾番雲母紙都惹鬱

金香

金壺記蠶書秋胡妻玩蠶而作
河中之水歌十四採桑南陌頭

其四

芳樹風情在簪花體格新可知王逸少不及衛
夫人

其五

牋紙劈桃花銀鈎整復斜却憐波磔好破體不
成瓜

李羣玉詩瓜字
初分碧玉年

其六

書樓新寶架經卷舊金箱定有千年蠹能分紙

上香

用上官昭容書樓及南唐宮人寫心經事

其七

好鳥難同命芳蓮寡竝頭生憎綠沈管玉指鎮

雙鈎

題武林鄒孟陽所藏李長蘅臥游畫冊

李生騎鯨去莫板畫本散落流人寰鄒生所藏
尤神逸參差畫出江南山初從武林寫游跡西
湖潑墨流潺湲六橋雨中每放艇雲棲月下頻

扣關山僧追游負囊米波女乞畫敲銅鑊意中
煙景亟追取興來筆墨不可剛虎丘天竺總腳
底山泉秀絕勤躋攀靈巖廊邊山盡響虎山橋
頭月幾彎西山梅花千萬樹盤螭光福爭回環
聚塢楊梅亞紺紫洞庭朱實垂朱殷巾車權舟
窮冬夏命觴染翰銷餘閒白頭荏苒好友盡青
山潦倒樂事慳鐵山寒梅空炤眼六浮閣址埋
草菅山堂懷人更感舊摩娑畫冊流涕潛山中
宿昔共游燕酒痕墨瀋猶班班惜哉不見此十
葉點染尺幅看爛編石田詩句拂雲浪大痴粉

本留孱顏潦收漁莊淥炤水霜酣寶巖紅滿灣
海山雲氣互吞吐羽人仙客時往還石田大癡
尚未死共捉麈尾戴白綸顧我與子不見耳安
知李生今不游其閒嗚呼安知李生今不游其
閒

小築詩十章為鄒孟陽作

小築維何鄒氏之廬湖山回環水木翳如偕彼
朋好悖我詩書斯晨斯夕以息以娛其日月不
居徂年悠悠邈矣物化零落山丘山窻鳥啼礪
戶水流伐木丁丁友聲曷求其懷人撰德允構

斯堂我師我友木主相望馮方蟬連

祭酒開之

揚聞鴈行

武林名士楊

附以寓公維李及王

嘉定

李長蘅虞山王季和

寒食重九佳節良辰薦此山蕨侑

以湘萼湖山舊主風月新賓神具醉止載矚載

欣

其依依杖函落落硯席燈瑩殘膏櫟儼遺跡

床橫清琴鄰奏暮笛庭戶愾然如聞嘆噫其在

昔蘇公守官于杭惠勤僧舍會哭歐陽六一之

泉芬於椒漿兩高巋然斯義不亡其凡今之人

豈無師友崇朝烏集日中兔走何如矢心况念

携手哭絕陳根墳鮮漬酒其抑抑鄒生陳義不

渝小築雖小孤山不孤春秋之日昔酒一壺載
滌載酌以祝吾徒其九吾徒烝哉冠衣楚楚爲弓
爲冶爾父爾祖湖波潮汐林木仰俯有風肅然
馮以告汝其十斯人之徒昔我同羣安得促地相
彼明禋作爲此詩誨爾諄諄先民之思以勗後
人

次韻和徐二爾從散遣歌兒之作二首

華堂人散只空屏搔首慙餘兩鬢星花好便判
辭舊樹絮飛終自作浮汀誰家榜柁歌青翰幾
處彈箏怨白翎惟有啼鳥并語燕尚留殘曲與

君聽

其二

歌舞偏隨夢短長黃金白髮正相妨誰傳一曲
高樓上却聽三聲客舍傍林木無情還激越梁
塵何苦尚飛揚燈殘月落君須記贏得西齋一
炷香

寄江上李次公故侍御仲達之父

黃田港口足煙波席帽山頭明月多舊事總歸
風伯訟新聲都付雪兒歌香灣夜雨催桃李釣
浦春風動綺羅花塢藥闌應次第好留昔酒待

經過

迎春曲春夜別陽羨蔣澤舉

去年春歸苦寂寞撫檻題詩對紅藥送春恰似
別好友情事懜騰數日惡今年獻歲春始迴山
翁迎春開春醅雪花盈堦梅繞屋好友又逐春
風來與君結髮俱壯游取次逢春三十秋年年
春恨如流水歲歲春風旋白頭與君就花移酒
海歎息風光不相待南翔青簡猶未沫吳門黃
閭今何在謂李長蘅
文起與君莫漫羨朱門朱門春
多白日昏矍瑜夜月愁眉樣屈郗屏風舞袖寬

不若春宵酌春酒促席行杯遞為壽明燈簫管
度新曲夜雨盤餐剪春韭惜君別去殊草草春
來未幾君去早却憐君去似春歸但願春來比
君好今年元夜兩冰輪料理三春作四春莫放
梅花隨臘雪更栽桃樹待春人

雪中楊伯祥館文麟過訪山堂即事贈別

去年燕山雪如掌巢車雪暗胡塵上紫髯參軍
足馬嘶黑頭總理鞞刀響今年江南春雪飛雪
花滿頭來款扉菡萏燈前談戰壘梅花樹下看
征衣自從瞽史持漢節瞽人周元忠以琵琶出
入奴營邊廷倚以講款

金繒輦載邊庭血虜騎爭誇曳落河廟堂自倚

中行說翰林飛書叫帝閭至尊感激模御

床但今中使催房琯指盧肯為金人縛李綱指伯

祥賈莊戰血高樓櫓元戎堂堂狗旗鼓周處詎

死齊萬年指督韓愈寧作孔巢父指伯匝天鋒

刃一頭顱鬼護神橋九死餘秦庭自效無衣哭

漢黨終慙舉網疎明發堂中酌君酒笑問于思

無恙否神州幸免犬羊族太史何妨牛馬走酒

闌耳熱夜欲分錯莫同雲是陣雲紅袖白衣猶

未逐彤弓旅矢竟何云江天漫漫失山樹雪柱

冰車塞行路江南老翁鬢如雪擁鼻吟詩送君

去

寄西蜀尹子求使君二首

歌殘棋罷曲廊東笑語依然礪戶空萬里音書

燈火外十年身世雨聲中黃楊節比餘生在時

閏正月苦笋心期晚歲同約略封題重搔首併將

花信寄春風

其二

簾閣焚香道氣和雷琴晉帖手摩抄詩依歲月

借蒼老才與功名未折磨秋水每將河伯笑春

風自度雪兒歌輕紅重碧猶能賦惆悵難隨鳥
翼過

尹西有棄官歸覲僑居成都賦長句寄訊
西有嘗爲余上萬言書於政地不見省納
故有感慨之言西有子求之子也

官滿曾無擔石裝傳家共羨漢循良談兵磊落
如師魯謀國頻煩論少陽髀裏何當悲老大膝
前應復念疎狂勒銘籌筆須公等莫戀西郊一
草堂

題女郎楚秀畫二首

曼綠輕紅約略分墨華凝碧濺羅裙煙嵐一抹
看多少知是吳雲是楚雲

其二

小艇疎簾水墨閒落梅風過點朱顏欲看粉本
頻臨鏡自掃脩眉畫遠山

送曾霖寰使君左遷還里二首

流言且莫問操戈節鉞名高卽網羅海內正人
當路少年來清吏左官多落梅幾瓣添行李新
柳千絲挽去波詆蕩天門無路撼白頭野老自
悲歌

其二

珠投璧抵亦何妨國論昏叟重可傷浮躁科偏
收卓異考功法爲中循良十州鑄鐵看他錯徑
寸鎔金笑我狂從此山中老樗櫟因君嘉譽比
甘棠

張玉筍中丞撫吳七載晉秩少司空總河
奉旨召見枉別山堂漬酒先隴于其行
也賦長句送之兼以爲贈四首

喧呼節鉞闢蒿萊罨畫旌旗炤水隈伏臘村翁
看上冢弓刀小隊候登臺橋邊彩仗差新柳花

外金鞍糝落梅衰晚慙恩兼悵別葦閒自櫂釣
船迴

其二

吳關楚望上游賒天塹真成隻手遮東海雲帆
輸北極西陵候火到南沙發兵每見頭須白憂
國還看鬢髮華早晚丹青傳畫像爲君點筆繼
乖厓

其三

金陵鐵甕賴併蒙新領河堤節鎮同橘柚秋苞
長向日桃花春水正分風馬銜沈璧開前路龍

護撥珠徒舊宮千里洪河才一曲恩波取次到
江東

其四

祕殿傳宣畫詔餘材官傳遽趣鋒車少陳南服
瘡痍狀徐奏東封暇豫書漏刻從容成故事天
章筆札久單疎頻年側席勞天明主莫訝神鈴
撼直廬

送林自名憲使歸閩二首

以君移疾意正值左官時不耐歸心切翻嫌吏
議遲江花愁解纜堤柳笑牽絲獨有君山石猶

存墮淚碑

其二

晚晚誰憐我倉皇又送君不堪垂老別長恐此
生分鴈塔嗟前夢驪歌愴暮雲天涯雙鬢髮能
不白紛紛

春夜聽歌贈秀姬十首

煙蛾掩斂睡痕輕撼起朦朧意態生無那泥人
腸斷處似醒如夢最關情

其二

情騰夢起逗春寒薄鬢叢叢宿粉殘臺上爭傳

尋夢好恰留殘夢與君看

其三

依約新鶯乍轉喉含情含睇總含羞一聲迸驕
嬌歌發玉裂珠跳不自繇

其四

當歌解得唱歌情無限情從歌裏生唱到夫憐
絃管急就中簇拍更分明

其五

一曲霓裳教一迴九歌天上少人猜明珠萬顆
歌喉裏不信明珠換得來

其六

口叶宮商耳辨詞一聲偷誤恰先知安歌顧曲
誰兼得驚倒當筵老曲師

其七

歌聲搖曳發陽阿急雪停雲舞袖多骨節會歌
聲解舞請君評泊道如何

其八

燭花偏趁舞僂僂畫鼓銀箏揭豔歌只有瓊瑜
不解語勾留紅袖似迴波

其九

蘭缸如晝夜烏棲漏點歌聲簇簇齊一曲未闌
郎未醉莫教明月過花西

其十

歌罷輕身下舞筵歌場如月舞如煙儂今也解
尋他夢三日歌聲在耳邊

乞蘭詩示西隱長老

山僧養秋蘭蔚蔚青與綠聞香嫌破戒挿髻苦
頭秃譬如絕代人寂寥守空谷榮悴向秋風何
異凡草木賣得十千錢三徑離松菊酒肉相薰
染珠翠竝攢簇譬如漢明妃嫁與胡虜族終當

刈作薪遑恤美如玉藹藹五畝園幽幽讀書屋
既脫蔬筍酸不受腥腐辱清歌時激颺纖手助
膏沐新婦配叅軍豈不得所欲山僧聞我言一
笑覆齋粥趣移蘭若蘭長伴竹里竹

廣陵鄭超宗園中忽放黃牡丹一枝羣賢

題詠爛然聊復效顰遂得四首

玉鈎堂下見姚黃占斷春風舊苑墻但許卿雲
來側畔卽看湛露在中央菊從土色論三正葵

讓檀心向太陽作貢會須重置驛

取吾家思公
貢姚黃亦兼

用置驛
之事

軒轅天子正垂裳

其二

鄭圃繁華似雒陽
斬新一萼御袍黃
后皇定許移栽植
青帝知誰作主張
梳貌花神刊譜牒
檀心香國與文章
若論魏紫應為匹
月夕依稀想鞠裳

其三

一枝紅豔笑沈香
道貌文心兩擅場
富貴看誰誇火齊
妖饒任爾媚青陽
開尊正愛鵝兒色
拂檻偏憐杏子粧
此是鄭花人未識
無雙亭畔為評量

宋人呼玉繁為瑤花亦曰鄭花云即廣陵瓊花也

其四

綉轂春風美雒陽
小闌何意見維楊
仙人鶴騎來雲表
玉女香車駐道旁
十里珠簾迴燕賞
萬花紅燭換風光
竹西歌吹雷塘路
夢裏華胥日正長

次韻答茅孝若見訪五首

孝若托腕時事思以布衣召見

故有諷止之言

綃頭還戀闕塵尾
且升堂地僻禽魚貴
春深草木香
灰心看蠟燭
矢口問壺觴
錯莫恩仇事
蕭蕭與白楊

其二

蝸牛亦有廬鬪蟻上堦除林宿驚絃鳥池游失
網魚五行占退鷁八祀記爰居載筆非吾事陽
秋待子書

其三

養生原有主齊物是吾宗掉尾羞鹽虎垂頭羨
酒龍鳥還多暇豫魚出正從容日暮柴荆外樵
歌伴老農

其四

世事看如許君今已悟不商歌何處達說夢豈

能求善觸兼防鹿知機并畏鷗永懷河渚客啼
默古今優

其五

夏馥爲傭雇蘇翁事灌園天人猶反覆筆舌敢
逐喧薄俗安繩墨清時許耐髡君看懸磔水汨
汨到波渾

有客

有客雄談抵夕曛又看銀燭刻三分君才如海
真難敵我病如喑了不聞有口未緘祇可飲此
身已隱更何云山堂近有三章約邸報除書罵

鬼文剽更回云山堂也亦三章
真璞始先感吸音了不聞音口未
音容華結游又齋又音難歐彼三
合音未吸音

所怪或戰

吾室舊有安蘇墨書都信極是
良齋為劃蘇蘇蘇蘇蘇蘇蘇蘇蘇

其五

其五

其五

初學集卷十六

牧齋初學集卷第十七

移居詩集 起庚辰三月盡十月

移居八首

殘生天與慰途窮是處雲霞媚此翁卜宅已居
青嶂裏移家仍在翠微中映門楊柳萋迷綠
戶桃花匝紅但放秦人雞犬去也應識路似
新豐

其二

未剪茅茨一畝宮斬新書架插西東
般薑鼠堆積人啮蝨蠅蟲典庫收藏三篋在中

箱裝載五車同縹囊細帙紛如畫好著移居物
色中

其三

傾筐倒度正紛然甕醬瓶齋亦播遷稚子提携
收茗具小姬擗當拾箏絃長須赤脚分魚艇白
犬丹雞配鶴舩若比洪厓作圖繪便教人說是
登仙

其四

松楸少別淚沾裾况是清明挂紙餘鄰里依依
留馬牧諸生落落從牛車裝輕使鶴移家具僮

乏教猿守庫書回首墓門初日裏杏園如雪柳
煙疎

其五

負郭茅堂蔭女蘿考槃仍在此巖阿亦知礪戶

西山少其奈鶯聲北嶺多

虞山北麓饒黃鶯
西山絕少故云

垂

柳池臺邀好客落花絃管遲嬌歌西園明月東
軒酒雙鬢蕭騷儘折磨

其六

郊居市隱各蕭閒阜背溪回只此山杜氏草堂
元兩地陸家老屋總三閒水南還往緣行藥雲

北經過亦閉關共是仙源人未識碧桃花外卽
塵寰

其七

榆柳交加灌木清携家卜築就黃鶯何當折閱
千金價但愛閒關百轉聲月下有人諳摸曲花
閒幾處合吹笙老夫更向春風笑斷送頻年反
舌鳴

其八

北山如玦抱吾廬近市依然隱者居却埽何須
愁剝喙蕭閒并可謝樵漁日斜竹磻收碁局月

炤苔堦把道書有宅一區吾事足客嘲揚子定
何如

雜憶詩十首次韻

海燕西飛不轉頭河中流水却東流莫愁湖上
春愁女總爲愁多字莫愁

其二

綠陰晝寂榻凝塵憔悴孤花一病身滿眼葵榴
開落盡不知何事又傷春

其三

石榴深院背花眠梅雨淙淙到耳邊六扇紗窻

三尺枕爲郎消受熟梅天

其四

梅子黃時晝掩門雙棲海燕又黃昏宵來梅雨
知多少自撥熏籠看淚痕

其五

金經小字粲銀鈎繡佛香燈炤綺樓自得蕭郎
花下信慵騰三月不梳頭

其六

夢裏相逢覺又分夢闌無那淚紛紛如今夜短
何曾睡贏得通宵不夢君

其七

炤眼榴花淚幾行五絲那得比愁腸可憐續命
絲千縷不爲愁人續斷腸

其八

丹砂鏤就合歡卮斟酌長憐玉手持莫訝脂香
傳竝口朱唇啣過不多時

其九

紫莖綠葉想橫陳淡墨幽窻自寫真題扇寄郎
還借問崔徽可是卷中人

其十

載得湘蘭餉莫愁桂梁蘭室思悠悠若爲化作
青青葉長護芳心度九秋

五月望夜汎西湖歸山莊作

輕雲如帷月如燭滿載江蘭汎湖曲吳娃向月
吹短簫月色簫聲竝如玉玉簫聲中蘭氣香月
炤蘭舟如洞房清歌一曲夜山曉十里山塘抵
許長

得盧德水宿遷書却寄六十四韻

自君持斧來輒訂銜盃約三春候倏過三年夢
猶醞含桃已褪紅綠竹旋解籜始泛南徐舟共

躡北固僑淮海勢鬱盤江山氣磊落於茲見偉
人執手向寥廓置席忘寒溫開顏匪噍噍試飲
京口酒還想平原酌清尊見須眉明燈炤離索
行杯笑持耳失喜嗟頓脚我欲傾百觚君已醉
三爵小戶殊激昂大敵乃前却擲榆山僧晒絕
倒候吏鄂酒闌始道故停杯語叅錯回風動江
臯舊雨響簾箔綠浪東樓樹紅燈柱亭藥依依
夢復壁惻惻念饘橐迷離死生交婉孌妻子託
肆赦綸竿難重歸華表鶴孫賓輕百口季布重
一諾死骨羞姦諛生氣激頑薄窮命脫網羅微

名耐咀嚙幸解雉兔災方信烏鳥樂丙舍聊晏
息丁田自耕鑿樵斧斫白雲漁歌和青箬詩酒
長留連絃管亦閒作客帆識簷窻戶屢問籬落
解嘲仍自笑罵鬼不爲虐醉狂如中風老顛任
落魄豈復羨休汝何敢附居雜鳳德覽盛衰龍
性異潛躍我爲雌伏鳥君爲鷲立鶚冰廳方舍
香霜臺俄荷棗柱下何堂堂班心正諤諤王師
猶在野轉運急焚灼 帝曰汝往哉漕事汝經
度轉漕起東南輦輪向幽朔江淮千萬艘銜尾
類繩約萬國皆陸海神京爲谷壑江楚來輻輳

燕齊到繹絡江東棋腹腴九塞局邊角譬如恒
山蛇首尾相攫搏羯奴割遼海妖氛橫格澤深
憂據敖倉每恨填松漠君銜督漕命雄才恣揮
霍坐嘯飛羽檄舉盃見方略萬艇朝建牙千旗
夜傳柝積帥洗手掌悍卒戟肩膊五月燕過河
諸侯大合樂酒肉視淮坻嘉會假鐘罇四海畢
飛輓六軍仰升龕庾氏看露積羽林思絕幕
至尊臨東渭延佇勞驅薄方當鼓吹迎未用舳
艫爵日得宿遷書使節尚淹泊尺符趣軍興扁
舟問民瘼信知王事勞更想別懷惡花殘向吳

亭柳暗潤州郭，淒清瓜州笛。縹緲廣陵角，江南水蒼茫。直北天錯莫，拖樓頻登頓。帆幡互戍削，高吟誰唱和。痛飲自酬酢，白頭苟非新。黃髮會如昨，還期河漢近。無嘆叅辰各。

得書之夕，夢與德水共簡書。筭得徐武功告天文一紙，因口占贈德水。有與我竝閑千畝竹，爲君長嘯一窻風。之句覺而成之。并寄德水河上。

銀漢無聲碧落空，夜山樓閣氣葱朧。正聞玉管參差裏，誰啓金滕夢寐中。與我竝閑千畝竹，爲

君長嘯一窻風。五更殘月紗幮外，也炤黃河古岸東。

送孫光甫再守泉州

棠陰秋來正蔚然，兒童竹馬又喧闐。遶城桐葉新幡戟，夾路松聲舊管弦。問俗不須停皂蓋，之官仍是酌清泉。他時溫詔如徵拜，記取重臨似潁川。

寄答閩中陳先輩

昌基二首

秋堂過雨一燈涼，秋士書來意苦傷。落第君應悲失馬，休官吾已笑亡羊。漸拋團扇恩情在，欲

採芙蓉道路長廿載相思頻命駕不成一水限
河梁

其二

屠龍誰子正縱橫談虎何人不震驚 聖代又
聞收放士老夫彌欲感餘生昆岡燎後山仍在
砥柱鐫來水自平賸欲與君論信宿涼風先已
款柴荆

哭魏三叔子

沖二首

銘旌仍未換頭銜玉立長髯散木函落第尚誇
新綵筆蓋棺終恨舊青衫叫闈有路天應泣澆

土無兒鬼亦饒人世于君荼毒甚招魂逝莫下

巫咸

越絕書云虞山巫咸所出

其二

無官無後又無年蛛網煤塵旅櫬邊襁褓兒先
從地下惟堂女不到床前分荆弟料三閒屋索
債僧焚一陌錢截髮可憐餘老妾異時為繼晚
寒篇

晚香寒色海寧張靜之二妾無子而自誓者沈啓南為作詩

鄭節母詩四首

梯几高堂燕喜時槐山眉樹柏舟詩月波樓下
波千頃好是夫人浴月池

其二

自將彤管教文章織斷機絲夜未央廿載青燈
萬行淚儘添膏火與兒郎

其三

讀書堆畔出樵車花月亭邊草不鋤惟有鄭家
通德里烏頭綽楔映金書

其四

一母將雛六翮成堂前三鳳正和鳴肩輿上殿
他年事扶侍爭傳曳履聲

茅止生挽詞十首

東便門開匹馬東橫穿奴虜護元戎憑君莫話

修文事掣電掣雲從此翁

記已巳十一月十八日從高陽公赴通事

其二

武備新編奏玉除牙籤乙夜不會虛文華後殿
屏風裏綈几依然進御書

其三

一麾萬石齟髻時指困英風更讓誰若使江東
無伯業也應魯肅是狂兒

止生總角時發粟萬石賑荒太守陳幼學

歎曰此異童子若中老人皆不如也

其四

千貔貅擁一書生小袖雲藍結隊行鞍馬少休
歌舞歇西玄青鳥恰相迎君有西玄青鳥記記其妾陶楚生登真降

其五

一番下吏一勤王抵死終然足不僵落得奴酋
也乾笑中華有此白癡郎

其六

閱江樓畔水蒼茫誰竝英寬大荒溫嶠謝玄
應執手與君只合鬪身強

其七

四海交游汗漫雲面啼目笑正紛紛惟餘百口
孫賓石北海亭前又哭君容城孫徵士奇逢高陽公之門人君之死

友也

其八

明月西園客散時錢刀意氣總堪悲白頭寂寞
文君在淚濕芙蓉製誄詞鍾山楊宛叔製石民誄詞甚工

其九

豐頤巨額稱三公鴨步鵝行亦富翁田宅凋殘
皮骨盡廿年來只為遼東

其十

家祭叮嚀匡復勳放翁死後又悲君過車腹痛
他年約長白山頭酹暮雲

次韻茅四孝若七夕納姬二首

花橋還勝鵲橋無河漢盈盈漏水但可應早嫁
歌盧女莫以無郎嘆小姑赤鳳巧偏栖玉樹烏
龍狂欲撼金鋪詩人老似張公子賤妾應為燕
燕雛

其二

花橋還勝鵲橋無歷歷星河近白榆曉鏡全粧
擡嫩柳秋衾半簟暖新蒲西陵柏下猶啼眼李賀

蘇小小歌幽蘭露如啼眼

南國瓜時旋破膚聞道紬書如太

史何妨石室貯清娛

隨清娛司馬遷之妾也見褚河南墓誌

題畫贈香山何相公

嶺表山川規外星扶胥海口界青冥為園五畝
無多地元氣堂臨浴日亭

姚叔祥過明發堂共論近代詞人戲作絕
句十六首

姚叟論文更不疑孟陽詩律是吾師溪南詩老

今程老莫怪低頭元裕之

元裕之謂辛敬之論詩如法吏斷獄如老

僧得正法眼吾於孟陽亦云

其二

一代詞章孰建鏢近從萬曆數今朝挽回大雅
還誰事嗤點前賢豈我曹

其三

崢嶸湯義出臨川小賦新詞許竝傳何事後生
饒筆舌偏將詩律議前賢

其四

高楊文沈久沉埋溢縹盈緗糞土堆今體尚餘
王百穀百年香豔未成灰

其五

玄宰天然翰墨香半庵祥符王惟儉字損仲博雅擅青箱

殘膏賸馥依然在約略流風近子昂

其六

楚國三袁季絕塵公安袁中道白眉誰與仲良倫新野

馬之駿過都歷塊皆神駿秋駕何當與細論

其七

當筵縱筆曹能始學全簾閣焚香尹子求伸蜀道

閩山難接席眼中二老竝風流

其八

畫筆南翔妙入神李長蘅晚年篇翰更清新和陶

近愛歸昌世也是風流澹蕩人

其九

關隴英才未易量刮磨何李競丹黃吳中往往
饒才筆也炷婁江一瓣香

其十

石言鴈字竝紛如點鬼窮時又祭魚臺閣詞章
衣鉢在柯亭劉井半丘墟

李西涯翰林後堂詩
柯亭劉井相西東琮

其十一

不服丈夫勝婦人昭容一語是天真
呂和叔上
官昭容書

樓歌云自言才藝是天
真不服丈夫勝婦人

王微楊宛為詞客肯與

鍾譚作後塵

其十二

草衣家住斷橋東
王微自稱
草衣道人好句清如湖上風

近日西陵誇柳隱桃花得氣美人中
西湖詩云
垂楊小苑

繡簾東鶯閣殘枝蝶趁風最是
西陵寒食路桃花得氣美人中

其十三

掃花剛竹吳橋句
范質公詩
掃花便欲親苔坐
剛竹嘗防礙月行最為清絕

食葉游魚揚補詩
余愛楊無補閒魚食葉如游
樹高柳眠陰半在池之句嘗

書之便面安得屏風譜佳什且將團扇寫清詞

其十四

安期年周永下筆無停手元歎徐波撚毫正苦心羸

得老夫雙眼飽授箱拂壁每長吟

其十五

王績鄉人笑子虛兔園典冊竟何如朱仲晦有代鄉人答

王無功詩見考亭全集中憑君若問金條脫解詩歸箋云是東臯好友也

道南華是僻書

其十六

梁溪欣賞似南村甲乙丹鉛靜夜論麗句清詞

堪大嚼老夫只合過屠門梁溪華聞修黃心甫評定明詩三十家

中秋大雨 永遇樂

三五中秋一場敗興雨淋風裂問訊嫦娥今宵

此夜幽悶如何說輝寒玉臂光凝翠黛長是孤

眠時節任淒涼兔掩蟾遮免炤半床愁髮晚

來粧了插花看鏡恍似身臨瑤闕燭滅香殘暗

風吹雨翳夢空淒切月宮深鎖桂輪何處莫被

愁人攀折應自恨青天碧海茫茫奔月

十六夜見月

雨脚千重雲頭萬疊剛風吹裂昨夜昏霾今宵

軒豁好向嫦娥說天公試手浴堂金殿瞥見清

明時節

時中朝新有大奸距脫之信

喜天邊穆穆金波重

蕭蕭華髮

桂枝易老冰輪難駐見此又愁圓

闕斗轉參橫高樓思婦織錦方悲切

杳砧安在栖鳥不定應為刀環心折須記取當歌對酒明

明如月

十六夜有感再次前韻

銀漢紅墻浮雲隔斷玉簫吹裂白玉堂前鴛鴦

六六誰與王昌說今宵二八清輝香霧還憶破

瓜時節劇堪憐明鏡青天獨照長門鬢髮莫

愁未老嫦娥孤另相向共嗟圓闕長嘆憑闌低

吟擁髻暗與陰蛩切單棲海燕東流河水十二

金釵敲折何日裏竝肩携手雙雙拜月

十七夜

白髮盈頭清光炤眼老顛思裂折簡徵歌釀錢

置酒漫浪從他說銀箏畫鼓翠眉檀板恰稱合

歡佳節隔船窻暗笑低顰一縷歌喉如髮生

公石上周遭雲樹遮掩一分殘闕天上覓裳人

閒桂樹曲調都清切干戈滿地烏驚鵲繞一寸

此時心折憑誰把青天淨洗長留皓月

九日宴集合暉閣醉歌一首用樂天九日

二十四韻

賓鴻之月爲重陽昔人登臨多感傷人生如鴻
誰非客忍對佳節空壺觴登高望遠不出戶連
山小閣臨莽蒼翠微欲上齊女墓綠淨遙分老
子堂白雲女墻作山帶紅闌橋水含湖光日影
漏穿出觀閣炊煙全鬱浮街坊西原東樓差足
擬龍山馬臺知誰強山椒白衣竝馬立樹紗紅
袖如人長須臾急雨灑飄瞥穿林觸石走欲僵
崇朝陰晴忽如此良辰燕樂安可嘗况復開筵
有佳客豈可命酒無紅粧清歌迭奏奮絲竹談

諧閒作兼笙簧吳娃行酒語明晰鄭老度曲聲
悠颺銀燈熒熒雨籠燭胡琴嘈嘈風刮廊坐中
合歡爭笑噓老夫霑酒仍激昂籬邊誰送九日
酒海內共知雙鬢霜莫嗤暮年裂風景已勝窮
命縣銀璫試問中書傳仰藥何似上蔡行牽黃
吟殘自綴菊花朵醉後細把茱萸房小婦盤飧
具麤糲兒子雜誦聽雷礮簾下侍兒舞鵲鴿掌
上姬人歌鳳凰劒舞酣歌想悲壯頭童吹帽嗟
風狂百年未滿會不死九日一笑庸何妨樂天
作達猶未達比較登高更幾場

白詩云須知菊
酒登高會從此

多無二
十場

短歌送林銓之吳門

君不見山陰劉念臺橫經籍書門不開白袍生
徒戶屨接釜甑亭午生浮埃又不見閩客林六
長手持劉札來相訪經年臥病虞山頭三旬九
食斷還往林君窮餓良可惜多君不愧山陰客
蕭條襤被何所之况值天高風急時昨夜郵中
傳片紙清漳孤臣幸不死君聞此言揮手別一
笑眉閒黃色起

九月望日得石齋館丈午日見懷詩次韻

却寄

敢云吾道大相顧此生微土室青燈火柴門白
版扉垂綸收釣具鍊石補漁磯小艇西湖曲延
緣候汝歸

其二

丹地披肝日彤墀濺血時帝容伸頰舌天與
護須眉榎楚寧非教術楊亦我師授書并續史
幽紮頗相宜

其三

衰鳳巢何在亡羊徑欲迷已知慙稷契寧忍愧

夷齊世事蕉中夢
人情李下蹊
夕陽亭畔路
只在帝城西

其四

以尔銀鐺日
追余楛拳年
詞林原有敘
園土亦推先
泣夏懷明德
踰冬憶古賢
天涯明發思
炯炯一燈前

冬日嘉興舟中戲示惠香二首

畫閣蘭橈取次同
蕩舟容與過垂虹
波如人面輕浮碧
日似殘粧旋褪紅
理曲近憐鶯
胆水弄花遙
惜馬騰風可憐平
望亭前鳥雙宿
雙飛每

一叢

其二

依然吳越舊
陂塘粉剩脂
殘水尚香已
分西施隨范蠡
拌將蘇小賽真娘
鉛華散落霑書帙
絃管交加近筆床
昨日虎丘西畔過
女墳湖水似鴛鴦

宿鴛鴦湖偶題

煙水迢迢與夢長
一般燈火兩般霜
鴛鴦湖上人相竝
燕子樓中夜未央

王店吊李玄白還泊南湖有感

歲暮孤舟易損神霜清寒薄總蕭辰窮思挂劍
酬知己老畏生芻吊故人落日閃金村破暝宿
雲屯絮水生塵延緣便欲追漁父蘆雨菰煙寄
此身

題南湖勺園

寒園竹樹正蕭蕭几席南湖影動搖有雨雲嵐
渾欲長無山翠靄不會消波深地角生朝氣水
落天根見暮潮樓上何人看煙雨爲君枝策上
溪橋

牧齋初學集卷第十七

牧齋初學集卷第十八

東山詩集一

起庚辰十一月盡
十四年辛巳三月

庚辰仲冬河東君至止半野堂有長句之

贈次韻奉答

文君放誕想流風臉際眉閒訝許同枉自夢刀

思燕婉還將搏土問鴻濛

太白樂府詩云女媧
戲黃土團作下愚人

濛濛若沙塵霑花丈室何曾染折柳章臺也自

雄但似王昌消息好履箱擎了便相從

河中之
水歌云

平頭奴子
擎履箱

半野堂初贈詩 河東柳是字如是

聲名真似漢扶風
妙理玄規更不同
一室茶香開澹黯
千行墨妙破冥濛
竺西瓶拂因緣在
江左風流物論雄
今日沾沾誠御李
東山蔥嶺莫辭從

集名東山取此詩句也

次韻

程嘉燾

居然林下有家風
誰謂千金一笑同
杯近仙源花瀲灩

半野堂近桃源
源礪故云

雲來神峽雨濛濛
彈絲吹竹吟偏好
扶石錐沙畫更雄
詩酒已無驅使分
熏鑪茗盃得相從

冬日泛舟有贈

冰心玉色正含愁
寒日多情矧拖樓
萬里何當乘小艇
五湖已許辦扁舟
每臨青鏡憎紅粉
莫爲朱顏歎白頭
苦愛赤闌橋畔柳
探春仍放舊風流

次日壘前韻再贈

新詩吟罷半凝愁
斜日當風似倚樓
爭得三年才一笑
可憐今日與同舟
輕車漫憶西陵路
斗酒休論溝水頭
還勝客兒乘素舸
迢迢明月詠緣流

次韻奉答

河東

以附見

誰家樂府唱無愁望斷浮雲西北樓漢珮敢
同神女贈越歌聊感鄂君舟春前柳欲窺青
眼雪裏山應想白頭莫爲盧家怨銀漢年年
河水向東流

次韻

嘉燧

蚤聞南國翠娥愁曾見書飛故國樓遠客寒
天須秉燭美人清夜恰同舟玉臺傳得詩千
首金管吹來坐兩頭從此煙波好乘興萬山
春雪五湖流
寒夕文讌再疊前韻是日我聞室落成

清尊細雨不知愁鶴引遙空鳳下樓紅燭恍如
花月夜綠窻還似木蘭舟曲中楊柳齊舒眼詩
裏芙蓉亦竝頭河東新賦竝頭蓮詩今夕梅魂共誰語任
他疎影蘸寒流河東寒柳詞云待約箇梅魂黃昏月淡與伊深憐低語

半野堂夜集惜別

嘉燧

何處珠簾擁莫愁笛床歌席近書樓金鑪銀
燭平原酒遠浦寒星剡曲舟望裏青山仍北
郭行時溝水向東頭老懷不爲生離苦雙淚
無端只自流

冬至日感述示孫愛

鄉人重亞歲羔黍薦履長婦女獻履襪兒孫備
蒸嘗自我失慈母於今八星霜四載哭苦塊兩
年繫銀璫歸來守丙舍尚未拜影堂豈不想愴
歎何忍覩容光怛怛杵撞胃戚戚刀俸腸泣下
誰能啜悲來不可詳創鉅痛愈遲躑躅還回翔
再拜強自割遣汝代裸將庸敢忘顧饗聊以贄
毀傷有故則使人禮不廢舊坊昔者晉二鍾起
宅千萬強荀勗負宿憾潛往畫門堂須眉儼太
傅衣冠坐堂皇入門大感慟終令此宅荒梧棗
痛口澤蓼莪廢篇章我雖慙古賢終慕詎敢忘

我昔晚生子視汝如圭璋汝之老祖母襁葆親
扶將兒饑午不食兒啼夜徬徨我年逾五十猶
在阿母旁與汝共乳哺與汝同袴襠母慈如負
債再世方了償名汝曰孫愛所以志不忘阿母
彌留時汝頭才及床今日拜家廟已能整襟裳
幼者長駸駸老者逝茫茫哀哉阿母墳宿草兼
白楊我生長頗領于世靡短長仕宦三十年但
餘書滿牀儘可與汝讀俾汝無面牆濟濟造門
士學問多老蒼文筆規歐蘇風雅論三唐汝如
念阿母夙夜勉就將落實咀其華誰能禁翺翔

我衰不足學師友咸激印孝友慕慈水慈水謂

也兄弟忠壯企高陽應山與臨邑臨邑故大司馬王公和仲風

義何雷礮人生不矜奮百歲空黍蝗勗哉男兒

志無愧弟子行今朝日南至緹幔灰低昂願汝

崇陽德排陰自開張陽生象敦復閉關養微芒

戒汝勿凌躁一線隨日長年至人古老歲晏天

滄浪嗟我至下心祝汝小歲觴何不如杜陵有

作成一囊何不效阿宜一月讀一箱卓哉杜牧

詩苦語箴膏肓汝其日三後書紳庶子張

迎春日偕河東君泛舟東郊作

罨畫山城畫舫開春人春日探春來簾前宿暈

猶眠柳鏡裏新粧欲笑梅花信早隨簪髻發歲

華徐逐蕩舟回綠尊紅燭殘年事傳語東風莫

漫催

河東君春日詩有夢裡愁端之句憐其作

憔悴之語聊廣其意

芳顏淑景思漫漫南國何人更倚闌已借鉛華

催曙色更裁紅碧助春盤早梅半面留殘臘新

柳全身耐曉寒從此風光長九十莫將花月等

閒看

春日我聞室作

裁紅暈碧淚漫漫南國春來正薄寒此去柳
花如夢裡向來煙月是愁端畫堂消息何人
曉翠帳容顏獨自看珍重君家蘭桂室東風
取次一憑闌

除夕山莊探梅口占報河東君

數日西山踏早梅東風昨夜斬新開停車未許
傾杯酒走馬先須報鏡臺冷縈正宜簾閣笑繁
花還仗剪刀催衫襠攜得寒香在飄瞥從君嗅
一回

庚辰除夜偕河東君守歲我聞室中

除夜無如此夜良合尊促席餞流光深深簾幙
殘年火小小房櫳滿院香雪色霏微侵白髮燭
花依約戀紅粧知君守歲多佳思欲進椒花頌
幾行

次韻

合尊餞歲羨辰良綺席羅帷罨曙光小院圍
爐如白晝兩人隱几自焚香縈窻急雪催殘
漏炤室華燈促豔粧明日珠簾侵曉卷鴛鴦
羅列已成行

辛巳元日

新年轉自惜年芳茗椀薰爐帶曲房雪裏白頭
看鬢髮風前翠袖見容光官梅一樹催人老宮
柳三眠引我狂西躋藍輿南浦擢春來只爲兩
人忙

元日次韻

蘼蕪新葉報芬芳彩鳳和鸞戲紫房已覺綺
窻迴淑氣還憑青鏡縮流光參差旅鬢從花
妬錯莫春風爲柳狂料理香車并畫檝翻鶯
度鸞信他忙

新正二日偕河東君過拂水山莊梅花半
開春條乍放喜而有作

東風吹水碧於苔柳靨梅靨取次迴爲有香車
今日到儘教玉笛一時催萬條綽約和腰瘦數
朶芳華約鬢來最是春人愛春節詠花攀樹故
徘徊

上元夜泊舟虎丘西溪小飲沈璧甫齋中
西丘小築省誼闡微雪疎簾鑪火前玉女共依
方丈室金床仍見雨花天寒輕人面如春淺曲
轉簫聲竝月圓明日吳城傳好事千門誰不避

芳妍

次韻

西絃管聲停笑語闐清尊促席小闌前已疑月
避張燈夜更似花輪舞雪天玉繁禁春如我
瘦銀釭當夕為君圓新詩穠豔催桃李行雨
流風莫妬妍

次韻示河東君

三市從他車馬闐焚枯笑語紙窻前晚粧素袖
張燈候薄病輕寒禁酒天梅繁放春何處好燭
花如月向人圓新詩恰似初楊柳邀勒東風與

鬪妍

有美一百韻晦日駕湖舟中作

有美生南國清芬翰墨傳河東論氏族天上問
星躔漢殿三眠貴吳宮萬縷連星榆長歷落月
桂竝蹁躑鬱鬱崑山畔青青谷水暎託根來淨
域移植自芳年生小為嬌女容華及麗娟詩哦
應口答書讀等身便緗帙攻文選緜囊貫史編
摘詞徵綺合記事見珠聯八代觀升降三唐辨
沂浴盡窺羽陵蠹旁及諾臯儂花草矜芟擷蟲
魚喜注箋部居分甲乙讎正雜丹鉛餘曲迴風

後新粧落月前蘭膏燈燭繼翠羽筆床縣博士
慙厨麓兒童愧刻鐫瑤光朝孕碧玉氣夜生玄
隴水應連類唐山可及肩織縑詩自好擣素賦
允賢錦上文回復盤中字蜿蜒清詞嘗滿篋新
製每連篇芍藥翻風艷芙蓉出水鮮頌椒良不
忝詠樹亦何愆文賦傳鄉國詞章述祖先採蘋
新藻麗種柳舊風煙字脚元和樣文心樂曲駢
千番雲母紙小幅浣花牋吟詠朱樓遍封題赤
牘遄流風殊放誕被教異嬋娟度曲窮分判當
歌妙折旋吹簫羸女得協律李家專畫奪丹青

妙琴知斷續絃細腰宜鞦韆弱骨稱鞦韆天爲
投壺笑人從爭博癩修眉紆遠翠薄鬢妥鳴蟬
向月衣方空當風帶旋穿行塵嘗寂寂履齒自
姍姍舞袖嫌纓拂弓鞋笑足纏盈盈還妬影的
的會移妍妙麗傾城國塵埃落市塵真堪陳甲
帳還儼畫甘泉楊柳嗟板折蘼蕪惜棄捐西家
殊婉約北里正誼聞豪貴爭除道兒郎學墜鞭
迎車千錦帳輸面一金錢勾踐獻西施於吳王夫差幸之每入市人
願見者先輸金錢一百兩門闌咽三刀夢寐羶
蘇堤渾倒踏黟水欲平填皎潔火中玉芬芳泥

裏蓮閉門如入道沈醉欲逃禪未許千金買何
當一笑媽釘心從作惡唾面可除瘡蜂蝶行隨
遶金珠却載還勒名雕琬琰換骨飲珉璠枉自
求蒲葦徒勞卜筮算軒車聞至止雜珮意茫然
錯莫翻如許追陪果有焉初疑渡河駕復似泛
湖舩榜棹歌心說中流笑語嫵江淵風颯沓雒
浦水潺湲疎影新詞麗忘憂別館偏華筵開玳
瑁綺席豔神僊銀燭光三五金尊價十千蠟花
催兔育鼉鼓促烏遷法曲煩聲奏哀箏促柱宣
步搖窺宋玉條脫贈羊權點筆餘香粉繙書雜

翠鈿綠窻和月掩紅燭帶花寒菡萏歡初合臯
蘇痲已蠲凝明嗔亦好溶漾坐堪憐薄病如中
酒輕寒未折綿清愁長約略微笑與遷延茗火
閒房活爐香小院全日高慵未起月出皎難眠
授色偏含睇藏鬪互握拳屏圍燈焰直坐促笑
聲圓朔氣除簾箔流光度毳氍相將行樂地共
趁討春天未索梅花笑徒聞火樹燃半塘春漠
漠西寺草芊芊南浦鳧何黯東山約已堅自應
隨李白敢儼伴伶玄密意容挑卓微詞托感甄
楊枝今婉孌桃葉昔因緣灞岸偏縈別章臺易

惹顛娉婷臨廣陌婀娜點晴川眉懶誰堪畫腰
纖孰與孺藏鴉休菴藹拂馬莫纏綿絮怕粘泥
重花憂放雪蕙芳塵和藥減春病共愁煎目逆
歸巢燕心傷叫樹鶻惜衣鶯睨腕護粉蝶翩翩
攜手期弦望沈吟念陌阡暫游非契闊小別正
流連卽席留詩苦當杯出涕泫茸城車轆轤鴛
浦擢黃緣去水迴香篆歸帆激矢弦寄憂分悄
悄贈淚裏漣漣迎汝雙安槩愁予獨扣舷從今
吳榜夢昔昔在君邊

鷓鴣湖舟中送牧翁之新安

夢裏招招盡舫催鴛湖鴛翼若爲開此時對
月虛琴水何處看雲過釣臺惜別已同鶯久
駐銜知應有鸞重來祇憐不得因風去飄拂
征衫比落梅

棲水訪卓去病

一官落簿賦歸來華髮蕭騷棲水隈陶令門前
惟綠柳江淹宅畔只青苔三閒老屋談經座兩
版荆扉避債臺贏得他時青史在儒林廉吏竝
崔嵬

夜集胡休復庶嘗故第

第宅蕭條不稱春空堂寂寂網蛛塵惟餘寡婦
持門戶更倩窮交作主賓休復無子去
病代爲主人燈火共
憐長夜客履聲猶憶下樓人廿年舊事東風裏
梁燕歸來又一巡

西溪永興寺看綠萼梅有懷梅二株蠶蚪
可愛是馮祭酒手植

略徇緣溪一徑斜寒梅偏占老僧家共憐祭酒
風流在未惜看花道路賒繞樹繁英團小閣迴
舟玉雪漾晴沙道人未醒羅浮夢正憶新粧萼
綠華

二月九日再過永興看梅梅花爛發髣髴
有懷適吾家仲芳以畫冊索題遂作短歌

書於紙尾

西溪梅花千萬樹低亞凝香塞行路永興兩樹
最綽約素豔孤榮自相顧飄黃拂綠傍香樓春
寒日暮含清愁依然翠袖修林裏遙憶美人溪
水頭徙倚沈吟正愁絕見君畫冊思飄瞥開懷
落落生雲山觸眼紛紛綴香雪羨君畫高神亦
閒趣在蒼茫近遠閒伸圭殘墨潑武水子久粉
本留虞山我將梅花比君畫月地雲堦吐光怪

乞君揮灑墨汁餘向我蕭閒草堂挂草堂深柳
淨無塵淡墨疎窻會賞真還將玉雪橫斜意舉
似凌風却月人

西溪鄭庵爲濟舟長老題壁

老僧能具四威儀稽首雲棲是本師頻炷香燈
頻埽地不拈佛法不談詩落梅風裡經聲遠修
竹陰中梵響遲飯罷松窻重回首夕陽花塢下
山時

西溪湖水看梅贈吳仁和

湖水尋梅共扣舷兒童齊指令君賢皎如疎影

通斜月瑩比繁英濯曉煙晴昊早看幽谷變寒
香偏借一枝傳西湖花竝河陽縣爭似西溪萬
樹妍

橫山汪氏書樓

人言此地是琴臺小院題詩闕綠苔
流水曲鏡奩偏向遠山開印餘屐齒生芳草行
處香塵度早梅日暮碧雲殊有意故應曾伴美
人來

二月十二春分日橫山晚歸作

杏園邨店酒旗新度竹穿林踏好春南浦舟中

曾計日西溪樓下又經旬殘梅糝雪飄香粉新
柳含風漾麴塵最是花朝并春半與君遙夜共
芳辰

橫山題江道閭蝶庵

疏丘架壑置柴關冢筆巢書斷往還盡攬煙巒
歸几上不教雲物到人間蕭疎屋宇松頭石峭
舊風期竹外山莫帶蝶庵成蝶夢似君龍臥未
應閒

餘杭道中望天目山

東西天目兩峯垂曾與高人約采芝

故慙山大師王孟夙

朱白人世但餘青嶂在此生空有白雲期雪中
樵徑流泉記雨外禪燈去鳥知舊事撞曾如水
碓停車惆悵立多時

發於潛簡昌化方明府

餘杭西去盡山城攫樹奔泉處處生雙目地形
垂乳下一枝天柱入雲平溪因碓激春撞勢石
與車爭犖确聲借得坡公詩贈汝亂山深處長
官清

陌上花樂府三首東坡記吳越王妃事也
臨安道中感而和之和其詞而反其意以

有寄焉

陌上花開正掩扉
茸城草綠雉媒肥
狂夫不合堂堂去
小婦翻歌緩緩歸

其二

陌上花開鷺子飛
柳條初撲翅塵衣
請看石鏡明明在
忍撇粧臺緩緩歸

其三

陌上花開音信稀
暗將紅淚裹春衣
花開容易紛紛落
春煖休教緩緩歸

奉和陌上花

陌上花開炤版扉
鴛湖水漲綠波肥
班駘雪後遲遲去
油壁風前緩緩歸

其二

陌上花開一片飛
還留片片點郎衣
雲山好處亭亭去
風月佳時緩緩歸

其三

陌上花開花信稀
棟花風煖颺羅衣
殘花和夢垂垂謝
弱柳如人緩緩歸

響雪閣

新安商山

綺窻阿閣赤山湄
想像憑闌點筆時
簾捲春波

塵寂寂歌傳石瀨響遲遲清齋每憶桃花米素
扇爭題楊柳詞日夕汀洲聊騁望澧蘭沅芷正
相思

登齊雲巖四首

二月晦日循桃花磯歷虎巖觀真珠泉抵
天門宿榔梅菴

梯迴磴復躡雲根白岳居然配極尊地折井幹
窺帝座厓剌屋雷啓天門累空重巖排松障界
壁飛流破蘚痕石室水池何處所桃花磯底是
仙源

三月朔日謁玄天太素宮是

世廟禱祀

所建

先帝祈年盼嚮聞紫壇降節正氤氲金莖上直
虛危位銀榜親書天地文東海幾經龍漢劫北
宮長列羽林軍綠章祕祝無多語願指靈旗蕩
稊氛

繇天門登文昌閣望五老三姑獨聳諸峯
巖欲游石橋巖未果

平臨雲氣俯崔嵬黟水黃山一抹開近巘紆煙
留翠駐遙峯排浪湧青迴嵌空陰壑生竽籟太

古陽厓闕蘚苔咫尺石橋成異境青鞵應自笑
空來

宮之右有桃源洞天壁間有故揚州太守
劉鐸訪張躡蹋詩版

別館玄都小洞天劉郎詩版尚依然曾聞魯國
爲兵解又恐嵇康未學仙流水落花看小劫兔
葵鷺麥記前緣留題聊示桃源叟遇問津人莫
漫傳

牧齋初學集卷第十八

牧齋初學集卷第十九

東山詩集二

起辛巳三月
盡一月

三月七日發瀟口徑楊干寺踰石碁嶺出
芳村抵祥符寺

黟山峻嶒比華尊連岡屬嶺爲重門我從瀟口
旋登頓裴徊薌石過芳邨山墮谷襲水見底灘
聲半出煙嵐裏千叢竹篠衣石壁一徑落花被
流水茅屋人家類古初橫枕溪流架樹居白足
女郎齊碓蕨平頭兒子半叉魚路出嶺中山始
放黃山軒豁見容狀一簇蓮花擁閭闔千仞天

都展屏障旋觀溪谷相迴縈浮溪如却容溪迎
溪流環山山繞谷周遭匝如列城茲山延袤
蘊靈異千里坤輿盡扶持倒寫萬壑流穢惡離
立千山護空翠天心地肺香難推明日懸厓杖
策時一重一掩吾肺腑到此方知杜老詩
禊後五日浴湯池留題四絕句
香溪禊後試溫湯寒食東風谷水陽却憶春衫
新浴後竊黃淺絳道家裝

其二

山比驪山湯比香承恩竝浴少駕鴛阿瞞果是

風流主妃子應居第一湯

南部新書御湯西北角則妃子湯餘湯遷

迤相屬而下

其三

沐浴頻看稱意身刈蘭贈藥想芳春憑將一掬
香泉水噴向茸城洗玉人

其四

齊心同體正相因被濯何曾是兩人料得盈盈
羅襪步也應料擻拂香塵

奉和

素女千年供奉湯拍浮渾似踏春陽可憐蘭

澤都無分宋玉何繇賦薄裝

其二

浴罷湯泉粉汗香還看被底浴鴛鴦
黟山可似驪山好白玉蓮花解捧湯

其三

睡眼朦朧試浴身芳華竟體欲生春
憐君遙喚香溪水蘭氣梅魂暗著人

其四

旌心白水是前因覩浴何曾許別人
煎得蘭湯三百斛與君攜手被征塵

宿桃源菴作短歌題壁示藥谷主人余掄

仲

天都諸峯屏障開白龍潭水綠浪迴
浴罷湯池暝投宿流泉午夜如崩雷
溪山至此非嘗調主人卜築領其要
刻疏雲氣排窻櫺穿穴煙嵐置堂
奧山中辛夷花放榮世上桃李俱
落英却笑仙源迷子驥還緣藥谷
訪容成老僧三年不出戶蓋頭莫
爲誅茅誤雨後黃山更奇絕看我
青鞵去時路

夜雨

淙淙活活夜分鳴知是溪聲是雨聲明日穿山
憑雨屐却過雲外看泉生

黃山第三十一
峯名雲外峯

初八日雨不止題壁

憑仗鞦韆尖與杖頭浮生腐骨總悠悠天公儘放
狂風雨不到天都死不休

桃源菴小樓坐雨看天都峯瀑布作

崇朝澎溷雨不止小樓翳蒼雲霧裏千流競寫
白龍潭四窻橫挂天都水水飛石擊相砢砢龍
虵攫拏山谷鳴軒楹圾坵天欲漏隱几屏息心
怦怦薄莫解駁日車露次第呼童戒杖屨始知
急雨非無故天欲老夫看瀑布

天都瀑布歌

天都諸峯遙相從連綿嶧屬無罅縫山腰白雲
出衣帶雲生疊疊山重重峯內有峯類皴染須
臾翦合仍混同曾雲聚族雨決溜溪山天水齊
溟濛是時水勢猶未雄江河欲決翻全壅良久
雨足水積厚瀑布倒寫天都峯初疑渴龍甫噴
薄挾石投奔聲礧礧復疑水激龍拗怒掉尾下
拔百丈洪更疑羣龍互轉鬪移山排谷轟圓穹
人言水借風力橫那知水急翻生風激雷狂電

何處起發作亦在風水中波浪喧逐草木亞搜
攬軒簸心中仲潭中老龍又驚寤綠浪瀆涌軒
窻東山根颯拉地軸震旋恐黃海浮虛空亭午
雨止雲戎戎千條白練回冲融憑闌心坎舒撞
春坐聽濤瀨看奔衝愕眙莫訝詩思窮老夫三
日猶耳聾

初九日發硃砂菴逕觀音巖登老人峯

黃山之麓山匝匝雙峯拱峙作門闔枝撐長訝
巨石墜攀躋惟恐兩厓合壽藤古木相夤緣一
徑陰沈少見天脚底溟濛踏雲氣頂上噴灑過

飛泉霞城乳竇亘山足陽壑陰巖互攢簇硃砂
洞室趾天都采藥仙源接香谷振衣直向老人
峯會雲壘涌鋪虛空初似炊煙浮樹杪却看膚
寸起封中縣縣飛絮却復迎團團車蓋遙相竝
白衣蒼狗半有無樓閣華鬢遞穿迸蕩胸觸石
彌網縕車馬決驟旌旗焚如濤如浪復如海至
竟但可名爲雲須臾雲歸如鳥集晞髮青松身
涇涇回頭却望老人峯偃僂仍向天都立

緣天都峯趾度斷凡橋下木梯憇文殊菴

天都趾右石屏南墮山嶧嶺嶠且堪峭壁崩厓

罅欲裂異松穴石攢如簪嶽峯數里俄半擘峯
峇百丈咸中弁峯巒移步貌改易蒼翠著面人
熏酣崎嶇鳥道陟又下摧頽繭足縮復揆盤回
下梯身入井嘯呼命侶聲出甌僧徒扶曳咸右
袒輿人負荷長左擔俯躬正恐肱三折側足祇
容劔一械挽葛千尋出洞穴誅茅一畝憇小菴
天部東拱勢翼翼勝蓮後負形沈沈上擁趺石
宮宅穩下臨莽蒼光景涵靈山削成隱佛土普
門應現開精藍清曉梵貝響林樾午夜佛火明
煙嵐香象拒門表奮迅神鴉乞食離嗔貪隨喜
許桑下一宿吾所慙

宿文殊院夜起看月

幸到文殊座投暝還同彌勒龕軍持漉囊在何
三十六峯月魄裏老僧夜喚神鴉起空山午夜
光景微濛濛薄霧霑人衣

初十日從文殊院過喝石菴到一綫天下
百步雲梯逕蓮華峯憇天海

昔與炤上人共訂黃山約執手文殊院披雲一
長嘯蓮花溝畔少人跡蛾度虵行限削壁炤公
前輓幻公推如上天門生四翼積沙披歷見幽

居白石錯落爲周陸背屋屢屨疊雲浪下方軒
豁呈日車亭午齋鐘赴天海接翅神鴉已先在
盤回折下百步梯行人項領與踵齊九步喘汗
十步息度樾穿林又枳棘青柯坪前縋韓愈蒼
耳林中失李白須臾復出海子巔意行縣度兩
莽然誰知絕頂千尋地只倚孤懸一綫天蓮峯
未上日已晚放杖松窻聊自忖莫愁山中石路
滑終羨老僧腳頭穩

登始信峯迴望石筍

石

三十六峯拔地涌此峯歧之纔及踵臨深爲高

地使然附婁翻能瞰高冢松枝懸度勢獵獵略
約孤騫風從從石徑會無飛鳥度茆菴尚有殘
雪擁上視近天心氣肅下臨無地魂魄悚平鋪
萬狀盡雲練幻出千嵐似丘壘邈迤迴望石筍
砦萬峯轟轟攢穹蒼故知造化善戲劇遂使鬼
物齊開張破碎虛空作苑囿搏掬厚土成瑤璋
孤撐扶陷互相詭妥伏感鬪不可詳益州二筍
何微眇天平萬笏空迴翔起視大壑限尋丈却
立萬仞憑堵墻高陵巨谷堆衆皴都邑嶺陸分
毫芒篆雲一點出九子突煙片縷回池陽心駭

神移耳目怠積蘇累塊今安在中天愴恍游化
人步地蒼茫窮豎亥錐鑿將無死渾沌刻畫何
當罪真宰經營圍辭記靈異忽漫執筆成晦昧
眼看夕陽信奇絕安知夜半不遷改笑殺區區
刻劍人但認一漚作黃海

登煉丹臺歸宿天海

是日日御薄下春萬里一碧澄秋容煉丹臺陽
訪丹室斗絕下瞰馮夷宮靈區占據宜神物陰
雨穿穴多蛟龍何當劫灰養伏火豈有石室支
劉風頰窺悼慄據櫺檻却倚眩運憑虛空丹峯

香爐屹相向翠微飛來翼以從三十六峯離又
屬化質幻出千芙蓉俛仰堪輿恣枕藉烟海茫
茫天地易星河錯落九天近日月回周兩丸迤
高山矗立羣螳封巨浸微茫一牛跡憶昔軒轅
鑄丹鼎相度茲臺作宮宅抽添火候查陽烏採
煉陰符用月魄役使百靈守鑪鞴錯列千峯儼
陛戟一襲珠函至今在千年鬼物誰敢搯天風
蕭騷日已夕攬衣欲下心不憚文楸萬木聲撼
撼素女清絃響金石南斗闌干星可摘安得商
飈發兩腋望仙峯頂看月白

十一日繇天都峯趾逕蓮華峯而下飯慈
光寺抵湯口

天都劣削不可上縋腰束胸將安往蓮花峯下
徑仄垂剗風蓬蓬吹勒回磴道千盤互攀援足
巡迴途目欲旋兩腋風生似掖扶絕壁雲遮失
泯眩靈山惜別如乍逢凝嵐積靄開重重丹厓
却轉圍紺殿翠微深處聞齋鐘未央長信已遷
改慈光香火千年在碧桃花開繞石塔砂溪水
流環法海晉門塔在寺後經丘歷广重躊躇却
望青峯卽畫圖襞褶雲衣看疊嶂微茫雪逕認

天都六六蓮峯倚林樾嘆息青蓮久蕪沒曾聽

當時吳會吟惟有黃山碧溪月

李太白夜泊黃山聞殷十四吳

吟詩云昨夜誰爲吳會吟
又云我宿黃山碧溪月

十二日發桃源菴出湯口逕芳村抵瀟口

老夫入山雨洗塵山容水色相鮮新老夫下山
雨祖道雨氣溟濛山更好春山皎潔如秋清先
庚後甲雨却迎已放飛流縣瀑布更鋪雲海媚
新晴人言此行天所予宜晴卽晴雨卽雨海市
何當用禱祈石廩還應薦酒醑三十六峯憎我
回屯雲罨霧晝不開桃花溪水尤惜別鳴車濺

轍爭狀洄山中桃花紅未了人閒春去知多少

試聽同聲山樂禽何如交響頻迦鳥汪澤民記云宿湯寺

聞啼鳥聲甚異若歌若答節奏疾徐名山樂鳥下山咸無有余於湯口道中聞之信然

湯池

圖經云湯池在黟山東紫石峯下香泉溪中有

湯泉黃帝服還丹肌膚皴折浸湯泉七日故皮

隨水而去斯須白龍見池中笙歌繞空雲霧消

散見珠函玉壺持歸石室浮丘公題記于南峯

石壁

峨峨紫石峯迸泉瀉天半下有湯泉口瀆沸然

鑪炭陰陽交劑和涼溫互輸灌暄暖便被濯清

冷宜醜盥立象徵明夷流惡類奔竄蒸池匪檻

涌瀆魁徒澶漫天為湯沐賜神用陰火燠不數

硫黃物肯比礪石潭天下湯泉多作硫黃氣惟驪山是礪石泉黃山乃殊

泉砂惟昔軒轅帝在宥天下亂神丹內服食靈泉

外烹煨一浴肌理皴七日毛髓換龍來雲翕集

鳳吹靈消散漿露玉壺凝冠履珠函貫至今石

壁題隱隱南山矸我來值春晚桃花湯渙瀾桃花

峯下有桃花溪水名香風解煩醒蒸氣泐微汗

嚙嗽綠腸淨拂拭紫絡粲原憲腫可差皇甫痺

應渙陸渾火焚灼焦原勢糜爛未能除人痾安
用滌身瘡誰把浮丘袖永懷玉女姪執熱竟何
云晞髮起長歎

天都峯

萬曆甲寅普門和尚始陟天都絕頂丙辰闕庵
和尚偕同衣九人再登累石爲塔揭二竿縣以
旛燈從下望之塔如人立幡從風迴翔厥後罕
有繼跡者焉

天都九百仞竦出羣峯上我行陟慈光屢屢正
北望繁如冕旒垂突如甲冑壯仙都儼侍衛蓮
花屹相向煉丹雖鼎足頽伏慙輩行削從大地
拔高與青天抗浮雲不能齊飛鳥孰敢竝古云
天之中軒轅此游放巉巖負斧依幔亭列衛仗
月白霞衣鮮風清廣樂張憑虛命天老排空召
雲將至今數千祀真都隱沉碣普門始荒度闕
菴繼策杖絕陁引猿臂缺竇縛馬柳橫穿身入
甕倒擲頭觸窻百仞更顛頓方石見輪廣累塔
象人立樹幡危石當神燈不可見色界吾安仰
昔聞三天都圖記互評量此爲天子都彼爲天
子鄣廬率西南屏大鄣東北嶂譬如侯甸服離

衛帝都王香谷氣方馥桃花水初漲帝將觴百
神吾欲合和鬯

蓮華峯

蓮華峯峯峒高與天都竝峯趾仄下垂屈盤隱
梯磴峯如蓮正開趾如荷有柄緣莖拊其瓣百
折峯始竟側身竇石腹刺促藕絲經罅漏忽穿
穴藕孔隙光映上有半閒广凸如蓮子迸又有
蓮花心數尺凹圓徑羣峯簇相拱田田荷葉盛
我來倚孤藤敢與剗風競支頤雲梯畔足跂目
轉瞪自從出湯口諸峯互延亘天都尊無如蓮

峯變難凭初疑玉井頭如船藕相擎簇簇青蓮
房萬葉擁却迎及憇文殊院西面看最靚妙花
聳青壁石瓣承其脛趺坐敷莊嚴明粧比端正
西北瓣未圓菡萏一峯稱南下桃花峯飛梁似
連賸玉縈近可攀連理遙相命數武俄改易一
曠已幽夙側出橫秋波平鋪落明鏡顧盼良已
煩畫圖豈能評惟有青蓮眼嘗見勝蓮勝

石筍砒

黃帝上昇後靈山忽涌瀆化成千尺峯乃是雙
石筍詭異窮堪輿象滋靡域畛幻化石有靈包

解筍無盡危，砒如防盛列。石類欄楯銳，如浮圖
轟鐵如劔戟，展叶闊如波濤。散感如篆籀，緊或
屬而駱驛連。迤復徐引或，宮而障圍撐柱匪。囚
儻或如經天星，未及尺而隕。或如靈胡掌，襞裂
地爲墳。象物總雜糅，攪搏互駁躡。大地刻玲瓏，
神匠碎齋粉。琢鏤鬼盡驚，奇譎天亦哂。我來陟
此岡，憑高數嶷嶙。指顧眩景光，心目困撫攬。西
北山中折勢與，削成準沈礪。仙都出青縹，翠微
近廬江。畫衣帶池陽，堆庾困虛煙。長藹藹人語
或殷殷，側足臨天荒。傾耳扣虛牝，片石投下空。

礧礧似雷震，中天腐骨輕。下界夕陽隱，生年兀

枯，符世事叢苞。稔安知石能言，不以我爲箇。高誘

曰箇竹
箇也

鍊丹臺

我登鍊丹臺，詆蕩上青天。旋觀六六峯，一一排
青蓮。崇臺據中央，宛如蓮葍然。千瓣復萬莖，迴
抱相鈎連。玉屏展青嶂，香鑪爇紫煙。奇峯劔危
石，櫛列差髀肩。橫若羅劔盾，轟若奮戈鋌。猛若
屯天獸，疑角夾九閭。伏若萬金革，擬鳴復收旋。
神靈旣役使，頑礧俱騰騫。相將守丁甲，誰敢窺

汞鉛日車陽焰煨月駕陰火然至今丹鼎中光
氣流朱殷在昔軒轅帝垂裳理八埏命龍戮絕
轡驅虎定阪泉六相資輔弼五賊收狂癩藥得
君臣配火用文武煎海宇鑪鞴定陰陽藥物全
然後事修煉黃服朝上玄服食八甲子圖經云
煉丹經八甲子黃
帝服七粒上昇登假千萬年有如世不治慕
道求神仙張樂洞庭野採藥黟山巔何異周穆
滿車轍馬跡焉軒皇去我久刀圭世莫傳願發
珠函祕進獻王宸前

慈光寺

普門頭陀行光明動 帝后 兩宮賜剌染少
府給組綬脫却金紋衣麻鞵露兩肘毘盧金像
設梵筴琅函剖煌煌慈光額 天子維獻壽金
貂馳北黜銀榜賁南斗寺踞天都隴面勢抗龍
首朱砂拱其左疊嶂掖而右飛閣千尋涌諸天
四圍負龍像震旦尊鍾魚六時吼幡幢內家織
齋鉢大官糗鋪張金世界變現錦陵阜嗚呼卅
年來滄桑逼陽九宮移長信屢卜應沙鹿久玉
衣寢廟重脂澤鏡奩厚八極誠晏如三災所時
有椒塗恩賜節榆塞金錢走招提佐軍興衲衣

我短後我來禮慈先俛仰思
文母僧徒日魚
雅禪誦午譚釵空山猶昇平慈恩正攝受泉流
石塔下桃紅碧溪口客拜漉水囊僧持埽花帚
尚祈白毫力庶復金輪舊頂禮九蓮座
宮中稱
慈聖
爲九蓮
菩薩涕洟重稽首

下黃山留宿故方給事方石書館題壁兼

懷孟陽

春盤剪韭夜留賓高館明燈笑語親左掖雞栖
傳奏牘中堂鵬止見承塵老成春後孤花少朋
舊秋來宿草頻尚有故人頭白盡爲言茲會重

傷神

過方司馬子玄故第

秋卷書生射策過卽看殊錫寄關河白山節鎮
烽煙少丹旄遄歸蔭敘多二八金鐘縣甲第三
千鐵騎擁琫戈白頭老友春風淚寂寞生芻問
雀羅

訪孟陽長翰山居題壁代簡

三日天都約裹糧差池燕羽正相望却回謝客
新游屐來訪盧鴻舊草堂長翰山中書數卷松
圓閣外樹千章到門他日何人記莫漫題名字

幾行

三月廿四日過釣臺有感

是日聞陽羨再召

巖瀨瞳瞳旭日餘桐江瀧盡挂帆初老夫自有漁灣在不用先生買菜書

牧齋初學集卷第十九

牧齋初學集卷第二十

東山詩集三

起辛巳六月盡十五年壬午

合歡詩四首六月七日葺城舟中作

鴛湖畫舸思悠悠谷水香車浣別愁舊事碑應
銜闕口新歡鏡欲上刀頭此時七夕移弦望他
日雙星笑女牛榜棹歌闌仍秉燭始知今夜是
同舟

其二

五茸媒雉卽鴛鴦樺燭金鑪一水香自有青天
如碧海更教銀漢作紅墻當風弱柳臨粧鏡菴

水新荷炤畫堂從此雙棲惟海燕再無消息報
王昌

其三

忘憂別館是儂家烏榜牙檣路不賒柳色濃於
九華殿鶯聲嬌傍七香車朱顏的的明朝日錦
障重重暗晚霞十丈芙蓉俱竝蒂爲君開作合
昏花

其四

朱鳥光連河漢深鵲橋先爲架秋陰銀缸炤壁
還雙影絳蠟交花總一心地久天長頻致語鸞

歌鳳舞竝知音人閒若問章臺事無合分明抵
萬金

催粧詞四首

養鶴坡前烏鵲過雲閒天上不爭多較它織女
還僊倖月筵生時早渡河

其二

鵲駕鸞車報早秋盈盈一水有誰留粧成莫待
雙蛾畫新月新眉總似鈎

其三

鶉火舒光炤畫屏銀河倒轉渡青冥從今不用

看牛女朱鳥窻前候柳星

其四

寶架牙籤壓畫輪筆床硯匣動隨身玉臺自有
催粧句花燭筵前與細論

田國戚奉

詔進香岱山嶽渡南海謁普陀

還朝索詩爲贈

戚臣銜

命報祿祥玉節金函出尚方天子

竹宮親望拜

貴妃椒室自焚香鯨波偃作慈

雲色蝗氣銷爲瑞日光岱嶽山呼那得竝海潮

音裏祝吾

皇

燕譽堂秋夕

雨過軒窻浴罷時水天閒話少人知凭闌密意

星娥曉出幌新粧月姊窺闌草空堦蛩自語採

花團扇蝶相隨夜來一曲君應記颯颯秋風起

桂枝

非君起夜來柳惲詩也

秋夕燕譽堂話舊事有感

東虜游龜三十年老夫雙鬢更皤然追思貰酒

論兵日恰是涼風細雨前埋沒英雄芳草地耗

磨歲序夕陽天洞房清夜秋燈裏共簡莊周說

劍篇

中秋日攜內出游次冬日泛舟韻二首

綠浪紅闌不帶愁
參差高柳蔽城樓
鶯花無恙三春侶
蝦菜居然萬里舟
炤水蜻蜓依鬢影
窺簾蛺蝶上釵頭
相看可似嫦娥好
白月分明浸碧流

其二

輕橈蕩漾緩清愁
恰似明粧上翠樓
桂子香飄垂柳岸
芰荷風度採蓮舟
招邀璧月成三影
擘當金尊坐兩頭
便合與君長泛宅
洞房蘭室在中流

依韻奉和二首

秋水春衫憺暮愁
船窗笑語近紅樓
多情落日依蘭櫂
無藉輕雲傍綵舟
月幌歌闌尋麈尾
風床書亂覓搔頭
五湖煙水長如此
願逐鷗夷汎急流

其二

素瑟清尊迥不愁
拖樓雲物似粧樓
夫君本自期安漿
有美詩云迎汝雙安漿
賤妾寧辭學泛舟
燭下烏龍看拂枕
風前鸚鵡喚梳頭
可憐明月將三五
度曲吹簫向碧流

和高中丞平仲乘城記事詩八首有序

崇禎辛巳闖賊破雒陽下汝郊乘勝趨汴自二月十二日至十七日并力疾攻者七晝夜高君平仲以御史巡汴乘城死守窮百道禦之乃退城幾陷者數矣 天子嘉其功立命爲僉都御史巡撫河南平仲作乘城記事詩自爲之序余讀而偉之乃次韻屬和焉平仲之序曰圍城中數瀕死惟自分必死故盡力守禦不復反顧也傳曰畢萬匹夫也七戰皆獲死於牖下死不在寇羣子勉之知言哉偉哉斯言可以辨賊可以

辨天下事矣并記之以示能者

雒陽宮殿污膾腥汝郊烽煙接杳冥幸有繡衣雄節鎮何妨銅馬遍郊垆連營殺氣傳鼙鼓列戍軍聲語索鈴盡夜城頭拜南極爭看弧矢直
狼星其四

高祖其二

膏塗肉薄踐城梯積甲真看熊耳齊漫道無功曾使鶴縱令有技已窮鼙持來簪筆驚狐鼠磨得靴刀瑩鷓鴣飲血登陴更長嘯儘教飛矢屬
吳犀

其三

汴京城闕倚高堅垂絕頻憂臟腑穿長枝馬墻
飛霹靂短兵鼠穴接戈鋌心同石礮俱糜碎身
與金錢總棄捐痛哭南雲判血指賀蘭燕罷正
高眠

其四

大梁城是漢黃圖持重軍威竝亞夫夜戰不會
開壁壘先登誰敢呼螿弧指攜荆豫回強虜鎖
鑰幽燕拱帝都何事至尊長側席安危時
至有人扶

其五

率土兵塵暗不開羽書旁午疾轟雷請看襄雒
新烽火還道昆明舊劫灰戰壘非熊無一老議
堂集鳳有羣才可憐七夜乘城容白髮盈顛馬
亦尪

其六

候火傳烽逼孟陬淮奸絳謀滿青鞵牛羊賤抵
將軍命蠅虱窮穿卒伍螯天上旌旗垂四野地
中鼓角殷層樓嚴城圍解爭相笑壯士還家盡
白頭

其七

捷書夕奏賞朝論節鉞傳宣日未昏
帝倚一身籌汴雒天留隻手障乾坤
彤弓旅矢應誰予大纛高牙賴爾存
螳賊埽清還有事更扶八柱正崑崙

其八

巢車望處斷塵囂鳥鳥聲傳寇遁宵
對酒旋頭頻自看罷棋屐齒不曾驕
瘡痍士卒連朝撫膏火軍書繼晷燒
馮仗天威須折簡赤眉青犢待君招

長干行寄南城鄭應尼是庚戌同年進士

榜下一別三十二年矣

人生忽如客行路少壯侵尋逼遲暮
白頭種菜猶昔人紫陌看花想前度
就中最愛鄭南城緩帶輕衣太瘦生
七言詩句推渠帥千佛名經獨老成
連鑣未幾忽星散中外差池不相見
君因忤物坐迤邐我緣鈞黨遭塗炭
懷袖消沉字幾年長干風月總堪憐
白夾風流樂府在青樓薄倖教坊傳
應尼少游長干為名妓馬湘蘭即今作白練裙雜劇至今流傳曲中
天下兵塵滿年少兒郎死樞筦武陵彤弓命未

反括蒼鐵衣血新澣

武陵樞相括蒼司馬皆同榜少年生也

功名

熏灼竟如何紅粉黃沙不較多
游人尚酹湘蘭墓子弟爭翻白練歌
不若與君贏得在瞪目支頤看流輩
且將分鹿付覆蕉莫以亡羊笑博塞
吳門仙治近麻姑莫謂盱江道路紆
若逢烏爪經過便還寄丹沙問訊余

贈建昌痔醫黃岐彬

衰老翻於痼疾便靈祇告戒起纏綿
得車知爾非論賞館客慙余已判年
果痔木癰除物害尻與神馬得天全
瘍醫本是天官屬醫國方頊耐

後傳

江上聞梅中丞長公計二首

書生片紙到江濱不信梅髯計報真
歷落鬚眉堪作鬼輪困肝膽可成塵
挽回滄海誠無計經略中原更有人
哭向蒼天聲淚盡西風吹折白綸巾

其二

勤王身自領弓刀爲國家真薄羽毛
嗣事闔棺留一舍渡河升屋應三號
謹呼死賊如聞赦哀泣餘民欲聚逃

公里居賊相戒莫敢犯公死麻黃不可保矣

早侍帝

晨求保定莫忘 明主正焦勞

小至日京口舟中

病色依然鏡裏霜眉閒旋喜發新黃偶逢客酒
澆長至且撥寒鑪泥盂光撫髻一燈還共炤飛
蓬兩鬢爲誰傷陽春欲復愁將盡弱線分明驗
短長

奉和

首比飛蓬鬢有霜香奩累月廢丹黃却憐鏡
裏叢殘影還對尊前燈燭光錯引舊愁停語
笑探支新喜壓悲傷微生恰似添絲線邀勒

君恩竝許長

寄榆林杜韜武總戎

不離戎馬作書蟬百戰功勞口不談黃髮老謀
秦蹇叔輕裘方略杜征南車嫌生耳還推轂劔
笑成衣自出函莫厭將壇求解脫清涼居士卽

瞿曇

韓蘄王晚年自號清涼居士韜武少以三教逸民自命故云

冬至後京江舟中感懷八首

懵騰心口自相攻失笑禁帝夢嚙中白首老人
徒種菜紅顏小婦尚飄蓬床頭歲敘占枯樹鏡
裏天涯問朔風睡起船窻頻徙倚強瞪雙眼數

來鴻

其二

世事那堪祝網羅
流年無復感蹉跎
繙書懶看窮愁志
度曲誰傳暇豫歌
背索偶逢聊復侏
儒相笑不爭多
晤言好繼東門什
深柳書堂在礪阿

其三

蹙蹙羣鳥啄野田
遼遼一鴈唳江天
風光頗稱將殘歲
身世還如未泊船
懶養丹砂回鬢髮
閑憑青鏡記流年
百金那得封侯藥
悔讀蒙莊說

劍篇

其四

屈指先朝侍從臣
函清東觀似前身
何當試手三千牘
已作平頭六十人
櫪下可能求駿骨
爨餘誰與惜勞薪
閑披仙籍翻成笑
碧落猶誇侍帝晨

其五

人情物論總相關
何似西陵松柏閒
敢倚前期論白首
斷將末契結朱顏
緣情詞賦推團扇
慢世風懷託遠山
戀別燭花渾未熄
宵來紅淚正

爛班

其六

項城師潰哭無衣聞道松山尚被圍原野蕭條
郵騎少廟堂鎮靜羽書稀擁兵大將朱提在免
胄文臣白骨歸却喜京江波浪偃蒜山北畔看
斜暉

其七

柁樓尊酒指吳關畫角聲飄江北還月下旌旗
看鐵甕風前桴鼓憶金山餘香墜粉英雄氣剩
水殘雲俛仰閒他日靈巖訪碑版麒麟高冢共

躋板

其八

陽氣看從至下迴錯憂蚊響又成雷烏鳶攫肉
真堪笑魑魅爭光亦可哀雲物暖應生黍律風
心老不動葭灰香車玉笛經年約爲報西山早
放梅

賀泉州孫太守得子四絕句

擁車鵲報石麟生乳哺喧傳燕喜聲太守政成
推佛國遍飛佛乳慰泉氓

地志泉爲
閩佛國

其二

浴罷蘭湯早放衙玉牙新發刺桐花埋羹太守
清如水湯餅偏能飽萬家

其三

忠獻堂前氣象迴龜齡碑版應三台泉南父老

爭傳說紫府真人又降來

韓忠獻生於州治王龜齡有碑

其四

合浦珠還未足誇史君掌上抱靈蛇君從嘗熟

湖頭看明月光先罩水涯

晉江縣東有嘗熟湖見歐陽詹文

半塘雪中戲成次東坡韻

千林晃耀失藏鴉紫翠迴簾擁鈿車匝地楊枝

聯玉樹漫天柳絮攪琪花薰鑪昵枕梁王賦難
燭裁書學士家却笑詞人多白戰腰閒十韻手
頻又

其二

方璧玄珪密又織霜娥月姊鬪清嚴從教鏡裏
看增粉不分空中擬撒鹽鋪作瑤臺粧色界結
成玉筋炤冰簷高山歲晚偏頭白只許青松露
一尖

次韻戈三莊樂六十自壽詩兼簡李大孟
芳二君與余皆壬午

幅巾杖屨古人餘步屨頻過慰索居馬齒共看
雙雪鬢菟裘終擬一蓬廬醉鄉祇恐愁侵迸睡
國長憐夢破除勤買青春禁百歲眉閒三尺爲
君舒

其二

共是衰遲託聖朝欣看山木長春條庚寅屈
揆偕吾降甲子堯年任爾驕六十平頭詩力健
三分鼎足酒盃饒老顛風景應須惜莫歎餘生
共寂寥

辛巳除夕

風吹漏滴共蕭然畫盡寒灰擁被眠昵枕熏香
如昨夜小窻宿火又新年愁心爆竹難將去永
夕缸花只自圓悽斷鰥魚渾不寐夢魂那得到
君邊

壬午元日雨雪讀晏元獻公壬午歲元日

雪詩次韻

九天凍雨合銀河一夜飛霰炤玉珂颺絮柳催
幡勝早薄花梅入剪刀多寒威盡掃黃巾壘殺
氣平填黑水波漫憶屯邊饒鐵甲西園鐘鼓意
如何

次前韻

玉塵侵夜斷星河
油壁車應想玉珂
歷亂梅魂辭樹早
迷離柳眼著花多
試粧破曉紫香粉恨
別先春罩綠波
一曲幽蘭正相儷
薰鑪明燭奈君何

獻歲書懷二首

香車簾閣思葱蘢
旋喜新年樂事同
蘭葉俏將迴淑氣
柳條剛欲泛春風
封題酒甕拈重碧
嚼累花幡護小紅
幾樹官梅禁冷蕊
待君佳句發芳叢

其二

香殘漏永夢依稀
網戶疏窻待汝歸
四壁圖書誰料理
滿庭蘭蕙欲芳菲
梅花曲裏催游騎
楊柳風前試夾衣
傳語雕籠好鸚鵡
莫隨啁哳羨羣飛

留惠香

竝蒂俱棲宿有期
舞衣歌扇且相隨
君看陌上穠桃李
處處春深伴柳枝

代惠香答

皇鳥高飛與鳳期
差池一燕敢追隨
桃花自趁

東流水管領春風任柳枝

代惠香別

春水桃花沒定期柳腰婀娜鎮相隨憑將松柏
青青意珍重秋來高柳枝

別惠香

花信風來判去期紅塵紫陌肯相隨池邊苑外
相思處多種天桃勝柳枝

仲春十日自和合歡詩四首

綠波南浦事悠悠天上人間盡斷愁却扇風光
生帳底迴燈花月在床頭平翻銀海填河漢別

築珠宮館女牛試與鴟夷相比竝五湖今日是
歸舟

其二

綺窻春柳覆鴛鴦萬線千絲總一香應有光芒
垂禁苑定無攀折到垣墻宮鶯啼處爲金屋海
燕棲來卽玉堂最是風流歌舞地石城山色接
吳昌

其三

數峯江上是郎家翰苑蓬山路豈賒立馬何人
論共載駢鸞有女喜同車飯抄雲母層層雪筆

架珊瑚段段霞宿伯世散花天女是可知天又遣
司花

其四

畫屏屈戌綺窻深蘭氣茶香重幄陰流水解翻
筵上曲遠山偏識賦家心詩成刻燭論佳句歌
罷穿花度好音休擲丹砂成狡獪春宵容易比
黃金

春游二首

踏青車馬過清明薄靄新煙逗午晴日射天桃
含色重風和弱柳著衣輕春禽欲傍釵頭語芳

草如當屐齒生每向東山看障子不知身在此
中行

其二

韶光是處著芳叢輾轉香車輾鏡中拂水礪如
圍繡帶石城山作畫屏風柳因鶯淺低迷綠花
爲春深歷亂紅璧月半輪無那好碧桃樹下小
房櫳

江上宿繆西溪從野堂故人及諸郎君置
酒感歎而作

瓦燈布翼野風吹碧血銷沉山鬼知兩字銘旌

還有一棺窀穸尚無期丁寧語笑追筵几戍
削衣裳憶履綦老淚縷縷揮不得江天雲濕雨
如絲

送涂德公秀才戊辰州兼簡石齋館丈

霜飛風擊白虹橫終古還看馬角生仗鉞不煩
收李固舉幡已許訟陽城爲臣爲友皆成是從
死從軍總一行太息輟耕何所適炷香稽首頌
王明

題將相談兵圖爲范司馬蔡將軍作

錦州城中塵垢堞大槍五旛紛么麼廿載軍儲

困劔鐵四海供輸窮箭筈當宁
肝食求幹濟中
朝辰告資剝剝金甌破碎繇朱
提玉燭叢殘爲
青瑣水上徒占頰尾多天邊未見旄頭墮忍看
北極獨焦勞但看南箕又軒簸
火燒武庫議曲
突風急中流選楫柁廟郎誰子
紆籌策圖畫有
人殊破碓鷗夷舊策意匠精龍圖後身腹甲果
垂簾白晝嘗深念蔽榻紅塵正匡坐憂國何時
兩頰肥籌邊更見雙眉鎖側席有人面相向虎
頭燕頤呈決裸俯躬無乃問韜幹奮臂何當支
拉攤料理茗香亦經濟位置琴書自帖安童子

夾侍狀蕭閒瓶花低垂意婀娜圍棋長日非等
閑清嘯中宵笑侈哆羽扇綸巾葛武侯緩帶輕
裘祭征虜此時前箸借幕中他日戎衣拜道左
眼中二老故自佳世上高人正亦夥豈無峴南
共黍飯亦有衡山撥芋火指撝醜虜成沙蟲睥
睨公侯類螺贏畫師畫師汝何頗再良一人胡
不可猿公石公非所希天津老人或是我

效歐陽詹翫月詩

崇禎壬午八月望我生六十一中秋少年對月
不解翫長大翫月多牢愁今年端變值多暇蕭

辰佳日心悠悠疾雷掉車天膜破急雨迎陳陽
歛收項臆棒出端正月挂我東閣昇西樓青天
無塵淨如埽綵雲頽空凝不流平沈大地作銀
海改換人世成珠丘金波穆穆映八表天門蕩
蕩開四游林木分明羽毛恐滄江徹底魚龍憂
恰如身逢堯舜清明世燭房月殿光彩徧九州
人閒喧歎競宵宴老夫歡忻搔白頭人言中秋
月節候配五行秋者金之氣月者水之精水得
金而盛月因秋更清此夜平分後金水互虧盈
一墮西巖又隔歲譬如天醉那遽醒老夫念此

意騷屑東家笑語闌南鄰歌管闕促織瞿瞿陰
蛩切切壁啣殘燈拚菱明滅倦婢鼾睡高病婦
嘖呻歇蔽榻芳塵凝盈尊昔酒竭老夫傍徨屏
營不能寢獨倚闌干顧影問明月試問今夜月
穿雲便炤閣道西叶帝車中央自昏旦三能兩
兩猶比連紫宮台堦光晻藹似避月駕成延遷
招搖梗河香相隔客星退次玄戈偏紛紛車騎
颺滿野御策朕朕主良前試問今夜月橫空已
炤三門東明堂葉無羅宿衛騎官積卒堆沙蟲
北箕教客狀突兀卷舌附耳紛遺從東壁圖書

儼乙夜文光祕府收朦朧試問今夜月取次會
炤天庫無天街一條直如箭旋頭罕畢淪前驅
昂明畢暗胥失色尺組奴孽應稽誅參伐左足
陷玉井鮮卑戎狄芒角殊試問今夜月東井東
南星矗矗狼星高張弧矢曲北落師門闔外蕃
天壘翻向虛南哭蚩尤旗長彗偏指五鋒旬始
光鏃鏃當陽匿影遜黃道昏夜敢與月徵逐可
憐今夜月不炤滄海水北鎮祠下燿火絕錦州
城邊血浪起胡兒角吹漢兒曲漢人骨築胡人
壘可憐今夜月不炤襄雒陽紅袖登車松漠近

白衣游魂道路長空餘大隄繞高峴忍向銅駝
望北邙可憐今夜月還照廬江郡居巢湖水叢
賊巢金斗城中失金印教弩高臺飛鐵鏃亞夫
古墳滿妖燐可憐今夜月還照大梁城重圍未
解類月暈傳烽飛礮徹夜明金梁橋空月如舊
獻王樂府誰人聽嗚月月不行邀月月不止問
月月不應如規瑱兩耳下方昏墊了不知結鄰
黃文者誰子無為耗燥徒問月妖魔反在月宮
裏人言金蝦蟇跳梁大無賴如兔顧在腹蝕月
吐光怪又有月中桂姿姿百畝外屈曲蔭大蟇

盤互作患害峨嵋清虛府二物爲芥蒂能令月
宮窄更使月光殺蝦蟇蟇不服罪張顛哆嘴嗚呀
呀幸逃上帝誅與磔遑敢突窻仍把沙桂樹在
丹路丁丁尋斧嘗交加繞身創癩瘰不得何能
庇彼癡蝦蟇蟇仙人暫輟修月斧向我拱手長咨
嗟老桂擁腫亦何咎蝦蟇蟇瓌碎不足科君思隻
手捫天橫身蕩災禳胡不梯雲入月伸紙彈姮
娥姮娥本非天上女乃是堯時諸侯妻控絃助
羿彈九日解羽坐使陽烏微一朝竊藥奔月窟
逋逃抵死不肯歸虎齒何曾拜金母龍工却欲

師湘妃投壺調笑素女竝擲米狡獪麻姑齊嘗
儀占僕良漫漶有黃枚筮果是非養成月精萬
萬古軒宮台室齊光輝姮娥姮娥爾會不如女
媧氏鍊石會補青天闕月宮八萬四千戶朝陟
暮繕工楫楫坐倚靈輪臥圓景枝柱何會費毫
髮爾會不如河漢女素手札札機杼閒七襄文
章擅經緯燦爛雲錦回星躔滿調天帝欺窮相
絕漢橫索下禮錢爾會不如須賤妾布帛裁製
勤婦功雖無巧心補龍袞亦有能手資天工彼
挹酒漿困南斗爾耽歌舞嬉月宮教成霓裳羽

衣曲三千年後唐天蒙阿瞞玉環歡失日漁陽
兵起曲未終九辨九歌閔天上遺此淫樂梨園
中姮娥姮娥叵耐汝恨無八翼飛上青天訴月
府月戶沈沈璫不開飛廉慵墮將誰與招呼月
御通我言望舒司轡袖手咋舌不敢干雇倩玉
兔銜章之帝所玉兔搗藥告我以不閒西河仙
人只有口喙長三尺不顧後見我飛章又心悸
倚樹不眠但搖手夜闌更漏急白露團團風瑟瑟
瑟籬邊介鶴鳴砌下秋蟲泣月榭消香篆風床
卷書筴老夫不語亦不歎支頤癡向中庭立病

婦夢回笑空床笑我白癡中風狂誰家翫月無
歌版若箇中秋不舉觴虎山橋浸水精域生公
石砌琉璃場酒旗正臨天駟動歌扇恰倚月魄
涼何爲煩憂添哽咽懣騰噤斷夜不央秋髮紛
紛伴墜葉細雨唧唧和啼螿自從姮娥到月殿
長依金穴飛夜光但聞高歌咏水鏡阿誰彈事
騰封章章上倘蒙天一笑素娥甚汝空奔忙老
夫聽罷心惻惻低頭自問笑狂易婦言可云慎
勿聽撐腸柱肚終難釋天上素娥亦有黨人閒
白叟將安適合眼猶見星煌煌入夢仍聞笑啞

啞打門未許驚周公倒枕一任東方白

壬午中秋日誦盧仝月蝕詩吟咀再四徘徊
永歎余老矣鬪茸眊墮欲如仝之涕泗交下
心禱額榻有不能也歐陽詹翫月詩有好樂
無荒良士瞿瞿之思焉乃作詩一篇題曰效
歐陽詹翫月詩或曰韓退之效玉川子月蝕
詩取其似子效翫月詩取其不似仝乎詹乎
似乎不似乎世當有知之者中秋十七日謙

益書

寄劉大將軍

頭顛叅差出五兵衝鋒掠陣更專征泰山石礪
千行劔清濟流環萬壘營擲地漆顛供飲器漂
池血瀋蘸題名篋中亦有陰符在悔挾陳編作
老生

駕鵝行聞潛山戰勝而作

駕鵝雙飛天雨霜黑雲亘天賊壘長烽煙汜水
連渦水城闕襄陽竝雒陽其中獻賊尤佼佼毒
如長蛇疾于蚤潛山敗劔燿游菟棄壘孤栖走
窮鳥督師堂堂馬伏波督帥貴花馬劉親斫陣
多劉帥三年笛裏無梅落萬國霜前有鴈過捷
廷佐

書到門才一瞥老夫喜失兩足驚呼病婦笑
欲噎鑪頭松醪酒新藝

黃長公七十壽歌石齋詹事之兄也

君不見見清漳孤臣逮繫時轟雷掣雷相奔隨北
寺紛傳葦筍籍石工待琢端禮碑又不見 聖
人一朝解羅網大闢虞門埽漢黨白鶴驚看華
表還金雞喜見綸竿上石公之兄隱者流蚤耽
黃卷今白頭雕龍吐鳳擅詞賦玉杯繁露傳春
秋七十長筵列孫子弟勸兄酬數千里共祝
皇恩無盡期漳海西連五溪水

送程九屏領兵入衛二首時有郎官欲上
林士書請余開府東海任搗勦之事故次首及
黃卷之白題輒讀士鳳對國知王林
虜騎流聞薄紫荆頻年廟算倚徵兵綸中督陣
推君往玉帳論功在此行僕射父兄勤遠戍江
東子弟敢長征成師誓戒先徒御最喜車攻頌
不驚

其二

百萬援兵集虎貔羯奴送死更何疑直須撒豆
堪成隊况復投醪可犒師絕轡殘雲驅韎鞞扶

桑曉日候旌旗東征倘用樓船策先與東風酌
一卮

壬午除夕

蓬華依然又歲除如聞幽仄問樵漁耗磨時序
心仍一管領山林計未疎爆竹聲中傳火急椒
花頌事解嚴初閒房病婦能憂國却對辛盤歎
羽書

牧齋初學集卷第二十

牧齋初學集卷第二十下

東山詩集

起癸未正月
盡十二月

癸未元日

江天海日自新正
宮柳春條淑氣生
花鳥房櫳看旋好
竹梧池館報初成
禁城雲護銅龍曉
閣道風迴金虎清
社叟醜錢期詛虜
擬儲昔酒賀昇平

元日雜題長句八首

青陽玉律應三元
是日朝正會禁門
北闕千官咸拜手
東除上宰獨颺言

上特元輔以
師臣之禮

甘泉烽

火通廷燎綈香煙覆殿樽朝罷開顏定相賀
年年虜退有殊恩

其二

長淮南北並喧豗鬼卒陰風捲地來計吏每憂
烽燧近援師長畏驛書催奴鋒却以長驅頓胡
馬疲於倒載回禽縱可知天意在臺街懸首不
須推

其三

淮海諸侯擁傳車長沙子弟近何如空傳陶侃
登壇約誰奉田疇間道書淮撫史公唱義勤王馳書相約投筆

儒生騰羽檄

無錫顧杲秀才傳號忠檄

輟畊野老奮耰鋤可

憐驕虜非勅敵狼藉游魂待埽除

其四

東略舟師島嶼紆中朝可許握兵符樓船搗穴
真奇事擊楫中流亦壯夫弓渡綠江驅濊貊鞭
投黑水駕天吳劇憐宰相無才思省壁愁看厓

海圖

沈中翰上疏請余開府登萊以肄水師疏甫入而奴至事亦中格

其五

老熊當道踞津門一旅師如萬騎屯矢貫獬豸
成死狗檻收牛鹿比狐豚懸頭少吐中華氣虜

面全禡羯虜魂歲酒盈觴清不飲爲君狂喜重

開尊

吳中流聞大馮君鎮天津殪會子禽一牛鹿喜而志之

其六

廟廊題目片言中准擬山林著此翁

陽羨公語所知曰虞

山正堪領袖山林耳

客至敢論牀上下老來祇辨路西東

延登盡說沙堤好刺促寧憐閣道窮千樹梅花

書萬卷君看松下有清風

其七

此生贏得老痴頑眼底孫劉亦等閒潘岳已從

槐柳列石生寧在馬蹄間中宵不作乘車夢清

曉長舒對鏡顏鄧尉梅花侵夜發香車明日向

西山

其八

春日春人比若耶偏將春病卸鉛華綠牕舊譜

薑芽字綺閣新評王藥花

山礬二株河東君所板賞訂其名爲王薑

余爲之記曉鏡十眉傳蜀女晚簾雙燕入盧家江南

尚喜無征艦院落燒燈聽鼓槌

閩人陳遜鴻節過訪別去二十年矣

嘆息吾衰甚矣時廿年重見益淒其未通問訊

先垂淚不識形容但記詩亂後情懷聽夜雨別

來踪跡看殘棋憑君卷却梁溪
六對簷花盡

一卮鴻節以李忠定公梁溪集相贈

留鴻節

突兀相看執手時依然舊雨憶前期觀河面皺
嗟君老臨井腰懸笑我衰歷歷舊游成故鬼悠
悠昔夢在新詩客中何物留君住憑仗江梅王
雪枝

馮二丈猶龍七十壽詩

晉人風度漢循良七十年華齒力強七子舊游
思應阮五君新詠削山王馮為同社長兄文閣學姚宮詹皆社中人

也書生演說鵝籠裏弟子傳經雁瑟旁縱酒放
歌須努力鶯花春日為君長

鄭大將軍生日

戟門瑞靄接青冥海氣營雲擁將星荷鼓光芒
朝北斗握奇壁壘鎮南溟扶桑曉日懸弧矢析
木長風送柝鈴蕩寇滅奴須及早佇看銅柱勒
新銘

魯孔孫畫竹歌

古來畫竹紛可數長慶蕭郎乃其祖白詩丹青以來惟一
人樂天一百八十字字字蕭森是竹譜畫師畫

竹如寫真肥皮厚肉非其倫能貌高流與靜士
豈是尋嘗點筆人吳門朱鷺好登涉華山歸來
竹滿笈倚壁揮毫每長嘯長鬣飄蕭散籜葉歸
郎昌世亦瀟灑風枝雪幹非嘗寫一莖兩莖自
點染花前酒後晴窻下朱老畫竹盈幾束粉壁
長竿森羽燾粉壁移居賃俗人卷軸叢殘散燈
燭歸郎知我愛此君便面長箋頻見分兒童竊
取友朋乞緣手散去成烟雲每言賞竹貴得意
東軒北牕饒倩翠朱老歸郎吾眼中渭濱千畝
皆畫筍錢塘魯生字孔孫頻攜畫竹來江邨竹
溪堂中坐繙閱堂前几上爭翩翩禾髯進士題
識影近樓仲圭往與可竹家南董誠有之譬如
說食應道果我桂香竹堂之瑞華堂五月生晝
寒輕紗幅巾六尺簞竹憲盡日凭闌干孔孫爲
人披松雪冷比霜筠直比節閒來寫竹如白雲
只可山中自怡悅我非樂天好事流一十五竿
慙見投作歌愧乏檀欒思但覺下筆風颼颼清
陰寂寂覆茅屋棋罷閒將道書讀月落庭空一
見君世間果有千尋竹

蘇詩十二章讀嘉禾譚梁生雕蟲賦而作

禾髯進士譚埽著蟲賦三十七篇援据古今極
命物理自稱原本於莊子蟲天之道及其遠祖
景身化書而吾竊窺其指意蓋亦荀卿子請陳
侂詩之意有託而云者也元微之司馬通州賦
七蟲詩二十一章其自序以爲備瓌細之形狀
而盡藥石之所宜屢亦叔敖之意傳稱禹鑄九
鼎使民入川澤山林不逢不若仁人君子之用
心古今一也余讀禾髯之賦慨然嘆息作蟲詩
十二章以詒之微之固云蛇之毒百蟲之輩亦

百而賦止於七蟲禾髯之賦蟲亦以百計而余
詩止於十二蟲余之意卽微之之意亦卽禾髯
之意也夫癸未三月十六日

蜘蛛

著物橫絲巧謀身長踦周螫人惟果腹送喜又
當頭映日文偏著漫天網不收禁持憑鼠婦吞
噬莫相尤

燈蛾

蠟炬明宵宴蘭膏炳燭房可憐爭撲觸猶欲較
低昂未許因人熱那能借壁光君看焦爛客仍

得坐高堂

貂尾同文彩

貂尾同文彩綉冠用羽儀塗泥羞末品鳴噪競

高枝聒耳熒絲竹如簧亂鼓吹何須誚瘖瘂饒

舌正堪啣

蒼蜂

清都為觀閣紫殿作芳叢不分針芒毒偏於甜

蜜中採花迷共主嚼蠟賺家翁又講君臣禮排

衙傲倮蟲

百四 蛟蝶

輕薄多生種紈繡夙世羣梢花矜粉在掠蜜與

蜂分栩栩乘宵夢翩翩傍日曛滕王圖畫裏麟

閣總輸君

螢

腐草只如此餘光能幾何偶陪金殿坐長向玉

堦過祕閣然藜少荒原結燐多天街昏黑候咫尺

尺亂星河

蒼蠅

附驥垂天表鳴鷄聒禁中巧能窺御筆誤欲點

屏風國土為樊棘分身作蠻蟲可能污白壁搖

翅任西東

蚊

得志昏黃夕偷生血肉身雄豪推豹脚醜類到
浮塵下策聊攻火中宵易及晨蟪螟爾何族巢
蜨自成鄰

蛔蟻

何物蛔蟻種偏能帝所游窟營管腑穢籍記肺
腸幽刺探攢多口鑽營並九頭三彭行倖近天
聽却悠悠

蟻

黨類聞羶夥功夫時術多真能傾棟宇未可薄
么麼輦重潛營塢身輕穩占窠拉邏憂大厦一
木竟如何

米蟲

宛爾能蝗黍公然學蠹魚耗應雀鼠並謀豈稻
梁疎不惜春農苦頻分尚食餘秋風黃葉候爲
爾重嗟吁

用僞吳末民謠
張吳王米蟲事

蟋蟀

玉井更籌急金籠幃幄長枕函聽選將簾閣看
登場益益成關塞輸贏一哄堂襄樊頻告急莫

惱賈平章

禾髯遣餉醉李內人開函知爲徐園李也
戲答二絕句

醉李根如仙李深青房玉葉漫追尋語兒亭畔
芳菲種西子曾將療捧心

其二

不待傾筐寫盞盆開籠一顆識徐園新詩錯比
來禽帖贏得粧臺一笑論

癸未四月吉水公總憲詣 闕詒書輦下
知己及二三及門謝絕中朝寢閣啓事慨

然書懷因成長句四首

青鏡霜毛歎白紛東華塵土懶知聞餘光乍可
從人借乞火何當向子分老去始諳魚鳥性窮
來長傍鹿麋羣絕交莫笑嵇康懶卽是先生誓
墓文

其二

垂簾隱几坐昏朝引鏡攤書意象遙香序可堪
論甲煎彈文誰敢證甘蕉三眠柳解支憔悴九
錫花能破寂寥信是子公多氣力帝城無夢莫
相招

其三

四朝天放一遺民
梧下松閒岸葛巾
仕路椰榆誠有鬼
相門洒埽豈無人
雲皴北嶺山如黛
月浸西湖水似銀
東閣故人金谷友
肯將心跡信沈淪

其四

虛堂長日對空枰
擇帥流聞及外兵
上命精擇大帥冢宰
建德公以衰晚姓名列上
王帳更番饒節鉞
金甌斷送幾書生
驪山舊匣埋荒草
譙國新書廢短檠
多謝羣公慎推舉
莫令人笑李元平

嘉禾司寇再承

召對下詢幽及恭傳

天語流聞吳中恭賦今體十四韻以識榮感

夕烽纏斗極
昃食動嚴宸
帝賚旁求急
天章召對勤
睿容紆便殿
清問及遺民
當宁吁嗟

數班行省記真虛
名勞物色樸學媿天人
上曰錢某
~~博通~~ ~~古學~~ ~~冠天~~ ~~四達~~ ~~聰明~~ ~~主三~~ ~~緘密~~ ~~勿臣~~ ~~東~~

除宜拱默北嚮共逡巡
日月誠難蔽雲雷
本自屯孤生心自幸幽
仄意空頻漫欲占連茹
如何關歎積薪丹心懸
魏闕白首謝平津
感遇無終古

酬恩有百身堯年多甲子禹甸少風塵歌罷臨
青鏡蕭然整角巾

次韻徐叟文虹七十自壽詩四首

少日秦川見此翁銀箏寶馬氣如虹春風嘗發
檀槽裏秋雨都銷羯鼓中皂帽呼盧三白轉航
舡醉客百分空歌闌舞歇黃金盡贏得童心老
尚童

其二

碁局何當看朽柯郎當舞袖自婆娑每臨百尺
嗟莖草更倚千章笑蔓蘿鼠穴啁啾因夢少鵝

籠吐納幻人多麻姑儼送千錢酒莫惜開尊緩

緩歌

其三

荆扉晝閉突煙輕世事渾如覆舊枰薄面親知
從水冷饑腸兒女任雷鳴蚊巢蟻穴多爭鬪鴈
旅鴻賓自却迎髮白可知心并白焚香散帙有
餘清

其四

悠悠名利笑排場屈指東陵更首陽七十古稀
應小駐百年未滿莫嚴裝浮生作伴皆歡伯白

眼看人即睡鄉無那當歌君不飲松風吹沸揀
芽湯

以二十千爲城北公稱壽侑以二銀瓊

滿陌青蚨滿百年爲君取酒祝長筵麻姑笑殺
臨安姥要索方平買酒錢

銀瓊雙雙介壽年更將瓜果助紅筵天孫自有

天錢使不比牽牛只欠錢

輓西蜀尹西有長庚二首

長庚晝隕蜀崗頭井絡星躔闔斗牛盍以三號

觀季扎余論書其尊人子求誰從永夜問班彪

萬言書上黃扉寢西有爲余上書七

字詩來青簡休往有長死骨可憐猶躑躅夔門

烽火接荊州

其二

濟物安民事已賒空餘一木寄天涯墓前定有
聰明樹世上應無富貴花不瞋日猶營四海未

亡竟已度三巴傷心豈合揚州死是處垂楊有

暮鴉

答嘉善夏雪子枉寄兼訂見過二首

清文麗句滿奚囊吳越才人敢雁行
初日芙蓉謝康樂月中楊柳孟襄陽
蓮花漏點清宵雨貝葉經緡靜室香
聞道孤山新結隱祇應配食水仙王

其二

汗竹溪藤卷帙紛千金敝帚漫云云
百年自笑吾攻愧後世還期子定文
閣涌諸峯山有月窻含半野水如雲
傍簷乾鵲何時噪洒埽先除蔽榻塵

中秋日得鳳督馬公書來報勦寇師期喜

而有作

衡門兩版朝慵睡簷前鵲喜喧墜地
鷓冠將軍來打門尺書遠自中都至
書來尅日報師期正是高秋誓旅時
先驅虎旅清江漢

左帥還兵厚

集元戎出壽斲

馬公督花馬諸軍自壽州出斲黃

伏波威靈天

所付花馬軍聲鬼神怖郢中石馬頻流汗漢上

浮橋敢偷渡

獻賊作浮橋渡漢江聞大兵至一夜撤去

浹旬風雨洗

青冥壁月今宵出廣廷老夫洗醖酌尊酒再拜先占太白星

燈下看內人插瓶花戲題四絕句

水仙秋菊並幽姿
插向磁甌三兩枝
低亞小牕燈影畔
玉人病起薄寒時

其二

淺澹疎花向背深
插來重折自沈吟
劇憐素手端相處
人與花枝兩不禁

其三

懶將沒骨貌花叢
渲染繇來惜太工
會得遠山濃淡思
數枝落墨膽甌中

其四

幾朵寒花意自閑
一枝叢雜已爛斑
憑君欲訪

餅花譜只在疎燈素壁閒

三良詩

三良者商丘段增輝
含素沂州高名衡
平仲遂安汪喬年
歲星也崇禎戊辰
賊陷商丘含素謝
賢良辟召率鄉人
扞賊賊再攻陷之
與翰林馬剛中俱
被執不屈而死辛
巳春賊圍大梁平
仲以御史巡方乘
城擊却之上特命
以僉都撫豫賊去
圍我師于郟歲星
以秦督赴援遇賊
于襄城力戰死之
是冬賊復圍大梁
平仲固守經年九
月汴沈于河平仲
渡河而北賊解去
得請

歸里奴兵陷沂平仲夫婦罵賊死之嗚呼是三
君子者皆余及門之士余稿項黃馘視息牖下
觀其接踵死事橫身殉國有餘媿焉白樂天有
哀二良文余放之以哀三君子作哀三良詩

段賢良含素

段生湖海士矯志營儒術道心旣淳泓俠氣亦
遊逸臂鷹弄丸劍亡羊視佔畢結客少年場樞
衣大儒室玄纁有道聘銅墨邑宰秩折腰恥鳴
琴蒿日憂化瑟投劾謝京華襍被返蓬華汝雒
彌稜氛汴宋連狂猶奔竄咸戴頭迎降多屈膝

拊心念多壘奮袂起投筆部署及婦女饋餉罄
饑餽孤城我援絕悉衆賊勢壹衝梯舞崔嵬礮
石碎虜粟城陷屍撐柱巷戰血泌滌堂堂馬翰
林並馬困綆縉生得齊慨慷逼降互呵叱南雲
敢後死臧洪意同日 聖朝崇死優所司奏報
失千秋萬祀後雙廟應萃律余昔坐鈞黨訟繫
拘請室子來訪幽囚再拜慰繭疾遂請職橐餽
奮欲負斧鑕重趼赴函丈酌酒祝元吉昂藏論
節義顛顛數國恤盈朝誰負擔舉世盡巾櫛植
冠髮如竿流吻涎欲溢斯人猶在眼其言良可

質篝燈見光芒
樞衣想削戍
哭罷霜滿天
詩成月東出入戶
長嘆息陰風助啾唧

汪中丞歲星

汪子循良吏
斤斤飭簠簋
修謹固足多
剽割亦可倚
一朝擁旄纛
三秦爲賜履
雄邊當重寄
豈能稱指使
況復覆軍餘
兵殘將亦弛
驚魂怯鼓鼙
敗氣蒙壁壘
賊兵下宛雒
軍威捲熊耳
乘勝圍郾城
援師絕蟬螳
牽率殘傷卒
長驅與角觝
賊遂拔圍來
其行疾如鬼
士飽如狼噬
馬騰競帆駛
我師不能軍
轍亂復旗靡
哀哉二萬人
割

屠盡羊豕堂堂大
中丞孤身策馬
箠首已離魚劍
胸猶集蝟矢
嗚呼數年來盜
賊易綱紀奕棋
國謀誤兒戲
師律否武夫
保項領文臣
塗腦髓項城傳
宗龍喪元襄城汪折趾
甲棄戰場外馬

歸賊營裏徵兵
搏泥沙催戰促
刻晷但知赴期
會誰復量彼已
歸元國子生免
胄先軫喜三敗
誰能反一死亦
可矣憶子爲郎
時矯時柱頑鄙
杭論每仰屋憤
盈或抵几褻革
固所期輿尸亦
求是哀哉殉國
心耿耿歿猶視
長歌聊慰藉人
生會有死不見
韓城相低頭向
槃水

高侍郎平仲

平仲巡兩河攬轡出西臺勅寇方燎原宛雜蕩
劫灰移師圍大梁投鞍成覆敦登陴七晝夜死
守憑崔嵬累卵我勢急中日賊焰推流矢傷闖賊目賊遂

南保汴唯女勞國功

帝念哉遂膺全豫寄旌

節煥昭回解嚴踰夏秋悉衆賊復來長壑截飛
鳥巨礮轟殷雷潛隧穿地裂梯衝舞風頽及堞
骨相柱薰穴尸成堆負戶我告病濡褐敵未衰
是時諸道兵左次大河隈半夜朱仙鎮十萬潰
喧歷沈城聲援絕饋運甬道隕擱石盡發棟陳

焦資炊骸噬指徒慟哭大臨誰告哀河伯爲解
圍洪流夜擊礪我師旣北徙賊戈亦南回 優
詔許休沐寵秩旌厥能還家甫秣馬虜入沂城
隳抗辭罵凶醜並命捐匹儕吁嗟忠壯士糾纏
罹凶災賊鋒乍撞秘奴刃旋提槌自從兵興後
屠潰自相偕金柝不夜擊和門嘗晝開九攻敵
已窮三板志不垂方鎮皆斯人王略寧未恢何
當大星隕坐見長城壞我非哭其私惜此天下
才

絳雲樓上梁以詩代文八首

負戴相將結隱初，高榆深柳愜吾廬。道人舊醒邯鄲夢，居士新營履道居。百尺樓中偕臥起，三重閣上理琴書。與君無復論榮觀，燕處超然意有餘。

其二

麗譙如帶抱簷楹，置嶺標峯畫不成。窄堵波呈雙馬角，招真治近一牛鳴。琴繁山應春絃響，月白香飄夜誦聲。還似王真清切地，雲窻風戶伴君行。

其三

會樓新樹絳雲題。紫微夫人詩云：乘飈倚衾寢，齊牢攜絳雲。故以絳雲名樓。禁扁何殊降紫泥，初日東南長自矧。浮雲西北任相齊，花深網戶流鶯睡。風穩雕梁乳燕棲，一曲洞簫吹引鳳。人間唱斷午時鷄。

其四

三年一笑有前期，病起渾如乍嫁時。泛舟詩云：安得三年成一笑，君病起恰三年矣。風月重窺新柳眼，海山未老舊花枝。爭先石鼎搜聯句，薄怒銀燈算劫碁。見說秦樓夫婦好，乘龍騎鳳也參差。

其五

絳雲樓閣榜齊牢知有真妃降王宵匏爵因緣

看墨會紫清真妃示揚君有匏爵分味墨會定名之語茗華名字記靈

簫真妃名鬱嬪字靈簫並見真誥珠林有鳥皆同命碧樹無花

不後凋攜手雙臺攬人世攜手雙臺亦真妃語巫陽雲氣

自昏朝

其六

燕寢凝香坐翠微辰樓修曲啓神扉逍遙我欲

爲天老恬澹君應似月妃霞炤牙箱雙玉檢風

吹綸絮五銖衣夕陽樓外歸心處縣鼓西山觀

去落暉

其七

寶架牙籤傍綺疏仙人信是好樓居風飄花露

頻開卷月炤香嬰對較書拂紙丹鉛雲母細篝

燈簾幙水精虛昭容千載書樓在結綺齊雲總

不如

其八

駕月標霞面面新玉簫吹徹鳳樓春綠窻雲重

浮香母翠蠟風微守谷神西第總成過眼夢東

山猶少畫眉人憑闌共指塵中笑差跌何當更

一塵

癸未除夕

三年病起掃愁眉恰似如臯一笑時漸喜閨門
歡有緒劇憐海宇亂如絲昇平節物椒花在感
激心情臘酒知莫訝散盤爭喝遣要將連擲賭
王師

甲申元日附

又記崇禎十七年千官萬國共朝天儉兒假息
潢池裏倖子魂銷槃水前天策紛紛憂帝醉賊
長安台堦雨雨見星聯衰殘敢負蒼生望自理東
山舊管絃

牧齋初學集卷第二十下

西



竹
石
集
卷
之
一
上

